

黃山志定本

黃山志定本卷三

吳山僧弘濟益然閱定

原姓汪名沐日字長光

新安閔麟副賓連纂次

同學程 守非二

吳 綺蘭次

吳聖修專公

江銘勲尙一

趙吉士天羽

汪士鉉扶晨

黃元治自先

汪 楫舟次

江 閩辰六

程 謙山尊

吳 苑枏香

吳之騷耳公參閱

靈異志

五石六鵠何以飛記異也山也奇所由事也詭君子之於物無所苟而已見之非一人載之非一書傳聞之非

一日紀靈異第五

萬曆壬子春僧一乘將創靜室石筍砭二月十五日鄰
僧慈愍過訪從左砭頰身下瞰一乘忽心動昔在峩
眉淺崖見佛光與此似將無欲放光耶念之未言而
雲日中倏見光見成五色俄一乘之徒二人泊工作
四人分塗來慈愍亟指示光滅矣因復禱光再見各
見自身之影工徒投禮在地皆大歡喜

佛光素著於峩眉五臺又劉定之登廬山見雲有瑞
光王安石爲之記今黃山常有之僧景賢云黃山瑞
光不一曰飛雲如片雲冉冉從山頂飛渡日中雲圓
如聚珠纍纍如串曰攝身光在對岸照徹若鏡遊人

所見不同大約數語曲盡變幻矣因採葺數則於後
皆詳於開山建殿之時前後此皆失記錄

聞汪應婁於萬曆壬子八月同溧陽史孟麟登光明頂
日中至丞相源忽見圓光三座浮紫金光色中坐佛
一尊左右皆舞身影久之始散

萬曆壬子十月二十七日邑人程道彥從仲偕虞山王
宇春僧無我遊海門飛來石午刻四顧無雲氣見東
南有光初如鏡面漸大如車輪廣映數畝其暈五色
中有觀佛端坐肉髻儼然佛有九十七種大人相肉
髻頂其一也

萬曆癸丑元旦郝璧郝之璽從普大師御馬監馬進
海子送大悲像升大悲頂雲氣覆積雪如銀世界三
宿而下遵丞相源行約三里許普大師祝曰馬公奏
至尊三宮寵命不憚崎嶇而來倘乘佛力見瑞相庶
於道場有徵萬方生信心矣言畢忽覩頂外紫霧籠
白光上白光尋散寶塔七層見旁立二小塔俱青色
或以爲奇石觀久紫白光盡滅惟覩青天後知所見
爲佛示也少頃紫白光復集無塔

萬曆癸丑九月十四日普門同西堂月空門人容川恆

心洞僧靜菴飛躡天都之巔半嶺見紫氣普門云此
瑞相光不作風雨虞乃登頂禮拜至三紫氣已消跌
坐盤石見虬松去身不數丈灼然有光普門欲語光
倏滅瞪視良久再閃再滅因跏趺曰惟安於道場有
緣應大見語次佛光五色大於車輪斜偃松枝外普
門膜拜梵咒贊之有頃復滅靜庵從別磴采藥至悔
未見踊辭不止松間光復見禮拜而下沿西坳數里
對蓮花峰峽中忽放圓光其大數倍曩者

萬曆甲寅九月初七日休寧劉懋賢以持大悲咒至師

予林結壇僧一乘見天晴霽有瑞光相亟同登始信
一峰佛光忽見然乍隱乍見不定俄而攝身光大見傾
側俯仰無不影受者俄而見橋光見青霞光瑞相非
一至二十七日未刻一乘復見光影非常呼云佛光
必再見俄而徧地皆放瑞光或遠或近觸處皆然劉
再拜自是持咒益堅

康熙壬寅中秋後二日報恩玉林大師僅攜一麈齋僧
擔笠抵慈光寺次日策杖登文殊院至奇絕處問僧
如何答曰某甲不會是日纖雨霏微羣巒皆掩趺文

殊座適僧行教下山侍者脫菴獻茶侍側少間雲氣
漸變一望如光羅綿合成一界危巒纖露驚濤賦浪
中無數連鱗飛盤浮沈蕩漾頂之異鳥來集又頂之
奇雲忽結一佛二尊者像身坐蓮花中一花一佛從
蓮花峰至座前漸散師云黃山其將興乎後慈光殿
成將迎師開法未果寂於淮陰

康熙戊申七月十五日汪徵遠同僧行偉登文殊院見
山中忽見雪山忽見寶塔忽見樓臺又忽見平時曠
野田舍農莊桃花楊柳如春日耕作等像自未至西

乃減

萬曆辛亥秋汪廣成同曹吳二子憩光明頂日將脯忽見古佛見金光中同人頂禮逾時始散廣成字天如邑人曾同蓮花洞僧滄溟并其子峻登天都絕頂有詩紀事近余門汪夢龍於康熙戊申暨同學洪申湯口程名臣數人將至始信峯道中忽見萬山蒼翠變爲純赤色俄頃瑞光大見中有一佛二菩薩螺髻六銖衣獅象蓮座種種悉備及大士韋馱龍王獻珠女紫竹鸚鵡飛龍龍背有佛衆人所見各得其一二惟

洪子之僕永通皆見之歸卽辭主祝髮去

祥符寺僧體空住山六十餘年每邁異境嘗同伴入山
溪處倏見瑞靄騰空樓臺虛托其上雲棟虹檐耀閃
遍日食頃乃散

天啓乙丑秋欽程星玉登光明頂觀鋪海日已下春忽
見鉢盂青鸞兩峯間有紅紫氣閃爍燭天成一圓相
大如轉輪五色暈週之乍見乍沒如是者三衆皆驚
愕歸語菴僧僧曰此祥光也余住山三十年僅一見
諸君日暮遇之至再至三良非易事

榮庵大師見佛光事載藝文志黃山紀異內

康熙丁未八月十二日慈光寺上梁前數日晝夜淫雨
不絕逮十二日辰刻雲陰解駁亭午羣峰悉露奇秀
碧天清朗無際忽見五色瑞光從鉢盂峰起橫亘數
千丈西接雲門峰上梁訖光未減少頃復雨合寺僧
人工匠及遠近縑素共見計萬人

萬曆癸丑八月二十五日潘之恆同馮觀察元成孝廉
五玉卞山人潤甫吳文學萬父宿師子林薄暮見紫
氛從北峰外沸起與石筍爭峻而白雲彌障之光瑩

中見羣山排空皆作金色界星河燦爛於上良久凡雲光所燭自西徂東無不見山因念獅子峰外爲石鼓爲玉屏爲擾龍爲赤線或輿或縮或偏無排闥當前者是雲光之幻非山本質矣質明起視固無夜中所見諸山佛之見瑞此爲最奇

萬曆壬子中元豫章汪應婁宿師子林見天海忽放聖燈閃爍滉漾如摩尼珠次夜復見前山放白毫光長丈許如屏如障吐焰直欲射人又一乘方輿應有靈布施金者春夜門限放光匠人皆驚起信然自山之

萬曆癸丑夏黃習遠同孫湛宿師子林浹辰無夜不見
聖燈或散或聚若遠若近一燈千燈至萬億燈以爲
螢而忽巨如燎以爲蟬而忽巨如虹惟昏黑夜尤明
聞佛燈著於匡廬子朱子王文成皆有詩今黃山屢
出妻見可竝美廬阜矣

鳳陽王全初同欽吳埤於萬曆乙卯閏中秋夜宿師子
林晚課畢忽道人疾報云佛燈三現纍纍然亟出已
滅待之見一光黃色蕩漾不定又一光色如銀亦蕩
漾旋沒忽大如月又出一光赤色

邑人方乾符卽方夜乙卯秋溪自鄴鉢禪院乘雪登師
子林至林已暮出視飛霧蒙山失前所見久之霧漸
解獅子峰前有閃灼狀僧指呼曰燈見矣羣躍觀之
一僧同往後檻縱觀則始信峯腰又一燈出須臾前
燈漸分數燈分至數十燈或隱或見出沒如小星惟
獅子峰頭及始信峯之腰二燈最明獅子峯明者如
琉璃望檻而來與觀者近不二丈復去始信峯明者
如秋月倏忽升沈亦熠熠近人相映爭明羣燈從之
往來霧中如江燈漁火與木上下遡時羣燈滅二燈

未滅

萬曆戊戌秋九月潘之恆自湯院尋鳴絃澗乘月歸更
已盡忽仰視天都峰其色如赭初謂天都之高更盡
猶見返照既而悟曰天都巍奇靈光自發向者之見
山光也非返照也噫天都洵奇淡夜有光尤奇

崇禎初益然大師下帷文殊院淡夜見有火球一具起
淡壑中如日無光茫目能正視忽分爲二殷然有聲
二分爲四四分爲八八復分爲六十四遂止其光漸
小漸收如前數皆有佛端坐球中望久漸散觀此可

悟天地生人之理並陰陽相摩八卦相盪之象矣第
球中有佛似不可以情識測六合之內論而不議可
也

萬曆乙巳鮑正元居蓮花庵晚眺見火光若鉦自峽中
起忽分爲二炬散爲五六炬如權上下移時乃滅廬
山朗上人宿蓮花庵亦見夕光與正元同

萬曆戊申仲秋下浣王之傑黃與由蓮花溝上海子是
日澄霽方入天門天若呈蔚藍隱約淡黝異常從者
疑驟雨將至競趨出仰觀日光有五色雲氣繚繞雲

倏散倏聚如是者五其散也如空青如流碧其聚也如簇錦如瓊璣乃其乍離乍合之間如碎月之在風潭風定而月如故如明河之懸火樹火盡而影猶寒噫異矣

萬曆庚戌僧一乘登飛光岫晨霧未散日光動盪中瑩如鏡五色爲緣人人自覩其形因名其山爲飛光岫趙宦光大篆刻石壁

癸丑九月二十七日僧靜庵二三輩訪一乘定空室中趺坐松下北向山脊間見輪光可覓皛白處若有影

疑佛疑人無定相青紫氣環繞之外緣五色飛光光
外暈起一輪如重城亦綠雲光五色日氣射入愈鮮
明樂府所謂日重光是也

崇禎己卯九月海寧趙振芳偕客遊光明頂頂西一面
深壑盡窺天際時將夕忽見日上丈許有異景其形
如八寶之類七八種懸列日巔大如日其色碧至日
落始滅且日之落不以漸如火輪竟墮已而躍出又
或墮或出不急落若是者數始落因疑此地極高直
望海水其墮也或海波分裂日落其中涉隨湧合抱

日以沈其墮而又出也或海水既合復開吐日露景
形若上舉是以升沈之勢遂成異觀

順治壬寅仲秋僧行致住文殊院日耽經行忽雲氣彌
空五色交錯雲日中見有若綠疏青瑣以棲千柱者
若飛甍畫棟以燦萬瓦者傑閣重樓虛堂廣殿城市
村落人物鳥獸草木花竹之屬無不畢備又明年夏
再見亦與前同

黃山僧爲余言山中東方未曦白雲如絮洶洶澎湃乍
沈乍浮翠巘微露日漸升如曳練澄江中所謂兜羅

綿世界也山中斜日西沈江浪沸起如飛赤電如車輪其大視常輪十倍回光襲人山木煖彩所謂金色世界也或夏日雲滿壑中忽湧泉若柱破雲直上須臾峰頭徧雨而日馭隔然無翳皆成奇觀

桐城方翰林拱乾在大悲頂見月生彩輪并異光析日事見遊記

玉屏峰在文殊院後星土形屏骨石端正莊嚴爲院擁護壯其形勢使人瞻仰康熙戊午夏日迅雷擊石從峰頂至麓裂一小縫闊四五寸石破天驚僧廣明居

院中恐怖欲死夫以菩薩棲靜之地開闢僅六十餘年乃雷霆忽毀其奇非天之示警羣僧者與身住選佛場心見地獄相者亦可憬然悟矣

萬曆癸丑嘉平月鮑祠部應鰲潘太學之恆與普公審藏經閣形勝過夜半丑刻乃開基時雪霰紛集澄空瑩澈毫末可覩衆僧呼佛號聲震山谷工人皆舉鋤相應遙覩山光十里外愈明似月出相照映而衣頂及鬚眉皆白事竣相攜而下白雲縷縷起山壁間及止息禪房霧氣瀰漫隔手不可見始悟先此爲瑞霰

光也

山中方晴霽時有陽霧自下而升漸升葉底漸積積至寸乃隆隆地積尺許葉上青翠如故松竹杉檜皆然惟草莖純白而枯者更光潤履之乾風化之而不濕徑烹之汁甚微飲之腹鳴蓋寒氣所結謂之木淞按木淞齊魯人謂之霜淞諺云霜淞重霜淞窮漢置飯甕歲穰兆也曾南豐冬夜詩云香清一榻氍毹暖月淡千門霜淞寒又有霜淞詩園林初日靜無風霜淞開花處處同記得集英淡殿裏舞人齊插玉籠鬆蘇

文忠在定武送曹仲錫詩亦云斷蓬飛葉落黃沙祇
有千林鬣鬆花應謂王孫朝上國珠幢玉節與徘徊
霜淞鬣鬆皆同音韻如夢送霜一作霧謬

康熙丙午八月二十九日宣城馮彪太平陳渭山慈光
寺陟文殊院值雲幕羣峰至掀雲牖遙見天都峰腰
橫彩雲一段約十餘丈五色絢爛照人二子歸寺詫
歎復約僧玉屏仝登歸途聞異香於山郵舊址前後
十步之外徧嗅不聞竚立良久乃已

宋元符三年朱砂發靈事詳藝文志汪師孟記茲不贅

明成化中泉忽變赤流三日人無知者惟一僧浴之
壽齡百歲萬曆乙卯朱砂又復涌出徧溪皆赤芳烈
異常飲者宿疾咸愈崇禎間有患瘋癲者入浴亦愈
同邑曹彌大讀書湯寺見一人鬚蒼黃日濯池中百
日變黑如漆此彰彰於人耳目者因竝記之

予友吳之騷云崇禎末其尊人讀書桃花源好於五鼓
時往浴湯池一口見五色祥雲從池湧出籠蓋池上
此又砂池之一異也

大雨後遊白龍潭觀瀑潭上承溪水高懸二丈洑湃入

潭水勢雄壯直瀉越潭而過如數十丈銀虹浮人巔
頂人行其下若行梁底水濺衣及領袂皆不濡習見
者以爲常乍見亦一奇也羅漢級高七八里禿露如
背中突一巨石居背之僉雨後水從背流至巨石處
崩潰不得直奔激怒旁衝分數十道橫見側出飛舞
而下若玉龍驚矯又若白鳳搏翔光怪百千莫能狀
又一奇也然非大雨不能得紀之以俟遊者

萬曆甲午普門大師從五臺將之伏牛過代州爲月天
無邊二上人所畱師夢境中見大山黑暗無路四壁

鐵色師向北行空中見一菩薩以手南指大呼南去者三師遽然覺於茶飯頃每見此境無旬日斷遂南遊由武陵白下抵白嶽久之入黃山深陽宋獻敬爲護法休寧劉懋賢爲定朱砂庵趾雖神志不離蓮花溝上然夢境久未見也癸丑八月二十七日忽自懸壁以木勾引而上見文殊跏趺蹟與夢境合然後徧告大衆闢石鑿徑而基成師語潘之恆曰自軒皇至今將五千載靈蹟始顯非文殊慧力指授不及此後之登茲院者無昧文殊接引也

萬曆癸丑仲夏二十一日賜佛將至嚴鎮已刻潘之恆
互扈閣中有塾師殷三仁課諸童子潘君季子弼亮
亦在又從姪名彥翊年甫十三忽仰視窓外有驚喜
狀目不暫瞬師再問不敢言怒之對曰有百千神物
在雲端行從牆角起沒今尚未止殷起見下拜喃喃
作誦聲亮怪之彥翊復佯顧如鑒語見若乘獅者若
乘馬牛駝象者飛者走者騎馳者波涉者揮袖而蹈
厲者亮目短極力視果有戴冠者若帝垂紳者若儒
執圭者若觀執杖者若趨數十輩向東行以爲盡也

同三仁舍之去而潘君諸孫以朝食甫至猶見種種
形狀是夜潘君舍中甚傳神見事潘徵之諸孫長者
十歲幼六歲耳各語所見或端拱聯行如三官或怒
目操如如立壇或甲冑捧劍背行如大將然不能名
爲杵爲韋馱或若獅子奮迅或若上漢浮槎他若鶴
若鳳若猿若龜若旌旄若幢蓋口不能悉數惟嘖嘖
舞躍自賞而已潘子以告顧譔譔曰今上頒賜寶佛
於黃山夫以千劫希有之佛一朝西來與多寶如來
見形於塔何異故令六種震動百神趨迎百神悉東

非馭獨西西示歸相東示迎相因幻此神境爾彼童
子何知敢妄語哉潘子因改閭顏爲幻扈

天都自然佛天都峯趾崩石而見者長七寸有奇偏袒
以立具大慈悲諦視自面逮項傍及左肩垂手露臂
皆金裝巾垂覆右臂背腰以下爲衣爲裳又皆白石
清淨法身金石融接旣無陶冶痕亦泯雕鏤蹟洵希
有之寶相也千秋里頤庄主人汪漁溪遊天都因夢
感得之華陽伐木工人築白石庵奉佛朱宗伯之蕃
有讚今菴乃副像自然佛聞藏必明山汪某家

兄月律師曾駐錫貝葉庵每月夜跌蒲團石持誦法華
誦畢返庵一夕見石忽高起恍惚中見白衣人指示
云和尚道場不在黃山華山虛席久矣語訖不見因
之華山受衣鉢於三昧律師卽繼華山席

維逸云昔有高僧坐文殊院跏趺石見壑下有取松者
呵之不止竟從趺石躍下保之此必文殊示異也載
肉之軀豈能至是惜羅忘其名號未得撰次入高僧
因附此

順治辛丑十月二十六夜欽太學士吳景暉以誕辰八

山禮四面佛是夕中宵月朗靜照巖泉與僧古森登
藏經閣倚欄嘯詠遙見一人長丈餘霓裳羽衣作冰
雪容從寺左峰頭凌虛冉冉來至寺側竚久俛不見
同見者爲吳霖旣及蒼頭文發諸人

僧二水於順治丁亥年住文殊院一日聞有聲自天都
峰來如簫如瑟如箏篴如琵琶如鐃鉦鼓鐘如笙簧
琴筑百千妙樂迭奏互陳於其間發時方息殆楞嚴
所謂梵唄詠歌自然敷奏者歟又羅逸宿鍊丹臺聞
天樂聲與此同

雲谷禪院因營造僧堂命工登擲鉢峰伐木適樹梢倒
挂別崖工人斷木見半壁有龕牖間生石蓮花一朶
以斧截斷匿灰中主事者根究之始出視色若琥珀
紅光耀目供院中數年兵亂失去守和尚每言及輒
太息良久

翠微寺前一松幹大數圍偶風折一枝懸於下枝幹膚
連處其勢必斷懸久本枝漸槁折者青鱗翠葉視他
松較茂焉遊人呼爲折枝松

崇禎辛巳新安大饑道殣相望黃山竹舒華成實多至

數千石居民採爲粉可糜可飪得全活者數萬人

唐刺史李敬方洛陽泉見龍事載建置志中

山之壑神龍所居人誤轉石下投則雷雹驟作庚子春
芳村謝師教偶灼爆者三頃刻煙霧滿空雨雹相逐
乃偃仆巖下移時始霽

慈光寺僧常遊白龍潭見魚欲舉鉢咒之鉢出白龍自
潭見僧大愕走

今蓮花庵乃故宋刹址每夜有龍化白狗竊香積飯僧
見驅之走入潭三日後大雨山崩刹亦陷

萬曆己酉吳光胃與遊侶晨發指月庵見西壑中光芒
萬道直觸天都蓮花之頂峯後祥雲瑞靄擁出日光
卽天孫雲錦不過是也同遊僧蓮臺曰此老龍潛壑
中吐焰與日爭光山居亦不多見

萬曆丙午三月丁景文讀書祥符寺日暮行山門外見
赤光如椀大從北山飛向南山照人眉髮可數其後
拖五色毫光長十餘丈者百餘道怪而質之普門師
師云此蜘蛛飛度吐斯異光度蜘蛛亦千年物矣

安公偕吳元震夜坐忽見紅光觸天安公曰昔在太行

曾觀未察何異時有樵者對爲巨蛇吐光於茲數十
年矣衆皆悚愕

白雞雄而冠赤翹翼善鳴縣登佛人所祝神雞也佛
自甲寅九月由巖鎮入山十月稅於湯谷之荒坡僅
密篠圍之覆以蒲葦乙卯夏雨纏布屨剗計爲推挽
以登頂莫之能任募神雞至雞登葦而乘其首則衆
邪許以舉之其行如飛雞鳴舞行益疾雞下則止輦
飲啄自如請輿請稅尊呼而神之登山若乘空不徑
不棧非藉神力不至此蓋自湯口磨茅殿凡十五里

四往而竣僅十餘日中阻雨者兩半日舊例役竣昧雞賽神主僧澗庵請贖而養之寺中

康熙壬寅秋慈光僧同客登文殊院遠望犀牛峰頂有天馬長丈許毛金色四足皆捧以祥雲須臾躍過十數峰每峰隔越數十丈一躡便過昔益然和尚爲諸生肄業院中夜半風起亦見天馬至佛前從門隙窺之少頃始去如僧言按天馬神龍之類黃山龍之淵數其有天馬也固宜

羅開美住喝石居僧柏庵語云蓮蕊峰有青猿數十採

百花登頂絡繹不斷一僧異之峯頂狀如腰鼓僧百計登陟頂下視若銳陟巔反平有小池卽衆猿貯百花處池水淺數寸色淡紅僧飲而甘之酒也還庵結伴欲盡取之比再登池水盡酒花亦枯槁他處石穴中間有之人往往誤以爲泉

麻陂潭側某年風雷交作居民震懼忽見霧雨中龍挾塔頂入潭旖旎沿途墮落後徧訪蓋涇邑馬渡橋報恩寺塔頂也每值煙嵐陰晦之際猶覺塔影隱隱見潭中潭在太平縣姑從舊志未刪

宋嘉定中緇素偶集普祐院忽見黑風從西北至中若
挾有異物移時風定乃有大鐵鐘一口飛至峰頂鄉
人卽其所結廬以奉聖像今鐘存院中本院古斷碑
載此事甚悉

萬曆戊戌徐氏子某以家難捨身直至鉢盂峰絕巖凡
三晝夜遇神詬之欲擊以雷乃返顛顛幾死

康熙癸丑有岑山渡程仁齋者其人半顛半慧或俗或
僧常出入黃山中一日張蓋登蓮花峰結腳跌而化
人未及知後繼登者見之蓋仍在手體亦不仆

萬曆同山大雪初霽蓮花庵僧啓扉掃徑出見雪上大紙一幅白如玉有光其方幅十倍京榜紙重數十觔僧秘不示人後稍稍有知者僧卽遷去

有客同登蓮花峰頂見西角天盡處一黑影如眠弓梳形勢壯闊蔽天一隅數時不異非雲實山也或謂峩峩曰此峩峩廬山天池寺秋晴可望戴李北地夢陽記黃山高出匡山或亦可見或謂見者爲崑崙山影非峩峩山影斯亦靈幻莫測之極致矣

康熙丁未六月中旬太平陳輔性過湯嶺上百級小憩

石亭見對面雲門峰半忽發大聲似雷奮天空陵谷
震動昂首視之見巨石掀翻彼此磕撞相隨墮下者
不可計石火灰埃復如電聯雲飛疑是老蛟破石而
出須臾水湧岸摧度此身填濶中泥沙矣既而聲收
塵散四山靜默凝神諦觀則半壁破罅新痕燦見何
風雷未作而有此怪異也數年前羅漢洞亦爲毒蛟
所崩黃山蛟龍窟穴峰裂石墜之事指不勝屈聊紀
一二以槩其餘

補遺

天都峰絕壁突石上每月夜有猿叉手端坐對月不少
動月景漸西則猿坐亦隨轉此數百年猿能吸月華
者

又僧述山中有兩奇獸形大畧似小鹿一毛赭黃如金
絲一碧如翡翠日照之背有光射石壁上一老猿長
顙黃身稍脩率衆猿戲巖外遊人至皆跳躑去老猿
獨危坐磐石上不少動如定僧

藝文志上

嘉隆以前通儒碑版不數數見後則山日開文日盛於以考典廢抒遊覽亦詳且周矣苟其論鑿鑿然夫孰敢有闕苟其文彬彬然夫孰敢有闕紀藝文第六

聖諭

勅賜徽州府歙縣黃山護國慈光寺藏經聖諭一

道萬曆二十七年

皇帝勅諭朕惟佛氏藏經舊刻六百三十七函我聖母慈聖宣文明肅皇太后續刊四十一函也茲者朕嘉善

道之可依念傳布之未廣爰命所司印造金藏六百七十八函施捨在京及天下名山寺院永垂不朽庶表朕敬天法祖之意弘仁普濟之誠使海宇共享無爲之福先民有言一念思善和風慶雲一念不善災星厲氣夫善念以有感而興無心而懈是以皇極敷言不厭諄懇聖品所貴善與人同古今相傳其揆一也且善在一人尙萃一家和氣若億兆嚮善豈不四海太和此經頒布之處本寺僧衆人等其務齋心禮誦敬奉珍藏不許褻玩致有毀失特賜護勅以垂永久欽哉故諭

部劄

禮部奉旨給黃山護國慈光寺住持僧如孝劄付

一道

萬曆三十九年二月

禮部爲仰遵聖意舉保住持世守龍藏永祝萬壽事祠
祭清吏司案呈奉本部送據御馬監太監閻鸞馬進劄
稱等於本年六月內欽奉聖母慈聖皇太后懿旨欽頒
龍藏賜額點名護國慈光寺兼賜佛像綵幡紫衣鉢杖
香燭等件欽送黃山安供道場永祝聖壽保國祐民隨
命鸞等保舉德行名僧住持本山欽此欽遵外本職看

得黃山係南直隸徽州府歙縣地方軒轅修道之所山
溪地廣向無菴院今行僧惟安誓志開爲十方海會道
場萬年香火於茲創建祝釐伊始焚修當虔非借高僧
難弘廣化歷訪得僧如孝精修戒律名重法筵堪以住
持山門理合舉保到部第如孝雖蒙皇恩欽依賜紫護
藏傳講焚修匪憑給賜割付則山廣僧繁勢難約束恐
有無耻衲僧紊亂禪規褻辱香火不特有玷名山亦且
有負聖意是以仰遵懿旨上懇垂慈備給住持割付以
便率衆焚修鈴束令山緇素庶僧可人人奉法寺可世

世祝釐國恩佛恩并垂不朽矣等情到部送司案呈到部擬合就行爲此劄仰本僧前去黃山慈光寺照劄事理即便冠帶住持領衆焚修祝延聖壽務要安分守禮毋得混亂清規不便須至劄付者

奏疏

慈光寺四面大佛奏疏

蔡 欽

奴婢蔡欽叩頭謹奏直隸徽州府城西黃山峰巒環秀甲於江南彼處有一善知識道號普門法名惟安三十二年木食草衣十二時究參禮念道力堅固爲衆所推奴

婢蔡欽看得有萬歲布施與僧人果明鑄造四面七層
毘盧大佛今有觀音寺性貴同奴婢叩頭請旨况黃山
靈異東土第一名區聖像殊勝爲當今第一功德因緣
時至以此佛供此山又遇是僧當爲皇明第一祝延聖
壽道場萬萬年香火天下人民凡隨喜者無不頂戴萬
歲萬萬歲更布萬歲娘娘德周法界功滿珠林爲世出
世間菩提果見者也伏望懿旨令普門善知識請四面
七層毘盧佛前詣黃山毘盧十方禪院供養祝延萬壽
無疆皇圖永固普令一切衆生瞻禮皈依百千億世攸

久無疆矣謹此具本土奏以聞

奏請寺名疏

萬曆三十九年

釋惟安

南直隸徽州府歙縣黃山十方院開山行人臣僧惟安
叩頭謹奏聖母萬歲老祖娘娘御前荷蒙天恩欽頒佛
大藏經護勅永鎮本山臣僧謹同本府鄉官等頂戴天
恩不盡惟於佛前祝延老祖娘娘萬萬歲懿躬萬萬安
切念本山原係軒轅黃帝修道之所故名黃山卽今見
有西峯松谷二大祖師肉身見在常時放光見燈臣僧
觀此祥瑞誠爲祝聖道場度生之所因結茅舍同衆飲

水喫菜煉魔諷經祝壽報恩仗衆虔誠之力感動鄉官
士庶發心修建接待賢聖道場但無寺名恐難垂久不
敢輕起爲此伏望天恩賜一寺名填於護勅承此開山
永鎮道場祝延聖壽共報皇恩廣化衆生皆是萬歲老
祖娘娘大願成就慈力化導功德無量因此謹將寺名
開後伏乞御點臣僧望闕叩頭具本奏請以聞

計開

護國慈光寺

護國普慈寺

護國慈覺寺

經

山海經

三天子鄩山在閩西海北

注今在新安歙縣東謂之三王山中江出其邊也張氏土

地記曰東陽永康縣南四里有石城山二有小石城云黃帝曾遊此即三天子都也一曰在海中

又云浙江出三天子都在其東

注按通志浙江出新安縣南密中東入海

今錢塘浙江是也

又云廬江出三天子都入江彭澤西一

曰天子鄩

注彭澤今彭蠡也

又云南海之山有山名三

天子之鄩山

此條重出

尉按郭璞所謂歙東乃以績溪大鄩山當之謂秦立鄩郡取此殊失考其引張氏土地記又不知何據至相沿謂廬山即古南鄩山亦謂之天子都天子鄩廬蕭梁喬辨之鑒鑒然亦不能定為何山也惟休寧正

循獨謂率山爲三天子都蓋率山最高爲江南之脊其水兩分東流者入浙西流者入鄱陽湖江州與鄱陽接壤宮亭鄱陽本一湖後饒又鄰境故世稱廬山之高爲三天子都之郭也西有匡廬障其右東有天目障其左由三天子都山盤礴衍達而趨奉淮結爲帝都此亦金陵形勢之大畧而凡江以南皆其屬矣又按三天子都經所謂南嶽也江表未之及何堪汪簡齋率山記節文 率山在千里百二十里俗呼爲張公山中古爲率山卽山海經所謂三天子都也郭一作都後世失其處或以績之大郭歛之黃山乘之而遂謂其上皆有三天子都又岐而二之指休寧率口上游之山爲率山皆非水經云浙江出三天子都在其東廬江出三天子都入江彭越西今惟率山之木山陰山陽一東一西而流人於江者與古今合國朝禮侍朱公大同嘗考知率山之爲張公山矣然不知三天子都之卽爲率山故猶以新安之江白績溪者出大鄣山龍巖山白歙者出古黟山卽今之黃山白婺源者出浙山白黟者出古黟章嶺諸山各

遶其源而不知孰出於率山之一源循生其下少從
世與家得見吳文正公所著遊圭表云率山乃江南
諸山之祖長四百三十里于都實彭濟兩江之源乃
隨然以吾里中所謂張公山者當之而無疑而以昔
所謂照山率山大郭者本一山也嘗欲一登以發其
跡正德初訂遊未果倏忽十年今始發書諸友申前
約先戒僕隸入山窮剎除徑以俟至則門蘿板危陟
登至黃茅岡岡下臨溪谷峻歷一山有所謂李家店
者乃古僧院住山時遊客絡繹行法樹贊之區今
已為慈翳莽中漉巨石一片上有三天于都刻字蓋
蘇軾摹度可驗山頂雨石對峙如門謂之石門又上
有兩石倒跨橋上木從跨下流出乃字之爲傳人跨
橋北正江源所自出清冽渾渾溪澗弄久之而去上一
山至清氣店獨石從山相傳爲支硎石乃憩嶺上橋
頂望剎而坐飲三四行直上三天于都特出上兩圓
土岡東西相望相傳爲橫鼓尖西爲溪衣岡中雖
小石岡二北岡稍低舊無名岡石上龜下象壁削于
石巖然有飛隆之勢據之嚴嚴心忤不敢俯視竊爲

兩巨中小以小爲尊此卽所謂三千大千都地俯視萬
山耶若止徑橫蹙累積莫得通連雲青綠白外與天
際始知是山之特出尤爲江南羣山之冠時山下小
弄而上則涼風飄飄細雨霏霏山高氣寒不可久立
下至清風嶺復盤折而下半山散雲隱隱庵宿焉是夕
月光如晝時以燈余自隨宿覺清涼不設寐起立露
中仰觀星斗可掬旦起度萬景嶺尋龍窟觀瀑布泉泉
自注巖瀉下以次爲三井井初涸焉并下石壁斗
絕竒而乞水者多夜往掩扉不見以長繩繫腰上繫
於木或人曳之稍緩援藤而下然僅能至二井三井
則絕懸壑以汲人涓滴卽用蓋崖巖雪壑壑益卽雨
至千等不能往隔嶺而望是日大雪還至清風嶺復
飲一登天都峯莫能從須俟陰雪霽四合巖山古注以
爲茂山多雲故巖字以多从巖而謂之巖山於此空
驗聞聞其巖身丈餘其狀如雲雲壑巖光高揭東
南天近一掌可卽西北萬里遠無涯際惟天與水四
圍相瀉吞吐吞而已胸次豁然精神飛動不知身遊
之在何境也日就暮下山道遠一二日始歸

注

水經注

漢桑欽云浙江水出三天子都後魏酈道元注山海經
謂之游江也地理志云水出丹陽黟縣南蠻中北逕其
縣南有北山山上有石特起十丈上峩若劍矜游江又
北歷黟山縣居山之陽故縣氏之漢成帝鴻嘉二年以
爲廣德國封孫雲客主於此晉太康中以爲廣德縣分
隸宣城郡會稽陳業潔身清行遯跡此山浙江又北逕
歙縣東與一小谿合水出縣東北翁山西逕故城南又

西南入浙江又東逕遂安縣南溪廣二百步上立杭以相通水甚清淺潭不掩鱗故名新安分歙縣立之晉太康中又改從今名

縣注作黟朱板亦同

志畧

一統志

黃山在府城西北一百二十里舊名黟山唐天寶末改今名山有峰三十六水源三十六溪二十四洞十八巖八第四峯有泉沸如湯常湧丹砂浴之能愈風疾世傳黃帝嘗與容成子浮丘公合丹於此又有僊人曹阮之

流亦嘗於此修真故山有浮丘容成諸峰溪有曹阮之名
歸安慎蒙名山志文多同此故不載

新安江源有四一出歙縣黟山一出休寧率山一出績
溪大鄣山一出婺源浙山合流至新安爲灘三百六十
唐李白詩聞說金華渡東連五百灘他年一攜手搖艇
入新安

淳熙新安志節畧

羅 願

黃山舊名黟山在縣西北百二十八里高千一百八十
仞東南則歙西南爲休寧西北則蔽於寧國府之太平

縣漢末會稽太守上虞陳業潔身清行遯跡此山而世復相傳以爲黃帝嘗命駕與容成子浮丘公同遊合丹於此其後又有僊人曹阮之屬故有浮丘容成之壑曹谿阮谿唐天寶六年六月十七日勅改爲黃山

黃山開經云改

黟山爲黃山而祥符州圖經乃云改黃山爲黟山今按鄭道元注水經云浙江又北歷黟山縣居山之陽故縣氏之然則黟縣本以黟山得名未聞前世謂之黃山也至天寶中好道家之說故以黃帝爲嘗遊於此因名之耳寰宇志又以黟山爲北黟山北蓋衍字山勢西北中拆望之類太華故自

前世亦名爲小華山有峰三十六其水源亦三十六谿二十四洞十有二巖八靈迹至不可勝數水流而下合

揚之水爲浙江之源山高而靈雷雨在下峰上往往有笙簫之聲

弘治志多本淳熙故不載太平縣志徧訪未獲因之

嘉靖徽州府志節畧

歙西北一百二十八里曰黃山一名黟山北峙九華西拓彭蠡南接廣信左挾浙河右起桐汭以盡海端皆支隴所分雖盤踞諸州縣而屬於歙爲歙鎮山巖峯三十有六其中多黃連紫朮又有泉如湯浴之可以已疾豐樂之水出焉趙東山曰黃山隤然中居委和四表有坤道焉故名黃山唐迄今刺史薛邕李敬方監司耿南仲

明興諸公多遊焉惟翠微僊人望僊三峯屬太平縣而
休寧無所屬

萬曆欽志節畧

謝 陞

域中之山獨尊而爲孝陵祖脉者黃山山峯三十六最
高者爲天都香谷源香水溪在焉其相峙而起者煉丹
峯鼎竈曰杵儼然具存鍊丹源洗藥溪在焉其連天都
而勢倒懸如舞者爲青鸞峯下有採藥源連青鸞而絕
聳者其色黯赤爲紫石峯下有湯泉源泉口如梳大出
於石間熱可點茗水下流湯泉溪中有湯院卽祥符寺

蓮鍊丹峰而勢如覆鉢者名鉢盂峰有洞名徑仙洞
洞口陰夕有光如星謂之聖燈又有擲鉢源錫杖泉連
鉢盂而起者爲桃花峰下有桃花源桃花溪處處皆桃
花水流入湯泉溪名桃花湯有峰宛如削成奇峭亘上
者名朱砂峰半壁有朱砂巖望之如崩頽提綱所不能
攀也下有洞有石有源有溪皆以朱砂名西南之峰其
勢昂踞首大於趾者爲獅子峰下有錦霞時時布幕因
名其洞又有香林源朱砂峰北其勢簇簇湧天而開者
爲蓮花峯若洞若源皆名蓮花其北宛若人狀者爲石

人峯下有白鹿源駕鶴洞峯西爲雲際峯下有藏雲洞
乳水源其西高峙者層巒而上如屏如展名墨嶂峯巖
中石乳四時長滴名石乳巖有阮長陰不見日名陰阮
源源水入白雲溪溪中潭影清絕白石橫底曰白龍潭
連墨嶂之西南者爲浮丘峯下有浮丘廟觀唐會昌中
殷有五雲源又有浮丘溪今浮溪是也峯之東其高與
齊者名容成峯溪爲容溪紫芝生於峯頂者爲軒轅峯
有僊人石座僊人洞紫雲溪僊石室又有毛人巖東北
高出頂若兩石人對坐者爲僊人峯下有僊人洞連峯

而源巖溪皆曰阮公者上昇峰也曰清潭峯者因潭而
名也潭水倒瀉百餘仞源曰布水溪曰錦魚曰翠微峯
洞源與寺皆無異名溪獨曰青牛峯畔則布水源在焉
曰僊都峯在翠微東源觀亦循其名北連而起者爲望
僊峯龍鬚巖龍鬚草生焉溪洞皆曰弦歌九龍峯合九
巖之勢如龍纏糾蜿蜒相屬亦以名其溪洞巖源宮觀
焉神九龍桃花間形如羯鼓而聳然亘天者聖泉峯峯
頭有湯池鄰峯遙望之則見池波沸湧其水向頂東南
而下入湯泉源甘泉溪其爲黃山之中峯曰石門峯石

相攀如門山之半壁一大石橫架其上兩畔相對一石
牀如龜形長數丈一石塔四層正圓如月陞闔二丈高
三丈上天下小狀如刻成又一石澡瓶引竅如杓柄流
泉出其中源溪皆以石門名峰畔則棋石峰其源卽名
棋石有石亭亭獨上檨霄攀日望之如幹者石柱峰也
源曰石壁有石劃然齊峙雲氣中通者雲門峰也亦以
名其源溪西望水淙淙而下長十餘丈者布水峰也源
曰百藥藥生於源也溪曰紅泉泉水紅色也布水之東
北峰曰石牀牀長一丈二尺濶五尺如白玉琢成上有

碧石枕三枚紫石牀三張石室源在其下如屋溪十餘丈丹霞之峰溪水亦曰丹霞而紅木遍生於源遂以名其源舉首雲際莫極其巔曰雲外峰上有杜鵑花繞峰而生從上俯瞰杏樹無數紅杏源在焉松林峯溪亦曰松林黃連源石榴巖俱在其下紫雲峰紫氣如蓋多柏木者源也勝榆花者溪也芙蓉峯隔溪有馬跡石石上馬蹄跡如泥印百花槽雜源洞溪間連之而西者采石峯也峯下多白石如玉黑夜卽見倒流而下有布水百尺其巖源俱以白龍名疑因石色純素橫亘猶龍也此

諸峰溪洞巖之大畧也大抵此山面面蓮花海子處則
漸入佳境也新安大好山水宜其然乎

緣起

大悲頂緣起

釋鎮澄

新安黃山有三十六峰卽三十六大士所居中央有大
悲頂衆望諸峰賓主互拱迴嵐疊翠華藏莊嚴真可類
矣維名山勝境待人而宏子門弟子普門行者觀茲靈
異發廣大心立弘誓願先將十方海會禪院於山之半
挂瓢走京師唱導檀門一時名公碩儒經白道流忻然

和之上聞慈聖國母賜寺額曰慈光并賜圓回金像暨
佛經一藏行者謂海衆所集不可一日無教導爲延同
志法師某公爲主以弘揚宗教開化四衆旣又於黃山
頂上建大悲殿五楹中立大悲十四臂像并立藥王藥
上二菩薩像大悲能救諸苦二菩薩常以法藥救濟衆
生法華經說若有人聞二菩薩名釋迦文佛當合掌讚
歎是人當得無生法忍身病心病一切皆除寄語行者
當勉力成就此事以鎮東南一方風雨順時黎民樂業
不盡功德端爲祝延我聖主聖母壽命無疆福德無盡

智慧無盡直至成佛永無乏少更冀八方寧謐四海晏
清凡在同願祥慶攸歸

法海庵緣起

潘之恆

法海庵舊稱硃砂庵修鍊者居之自馮司成開之來游
詫爲大叢林地逾二年而普門禪師遂乞爲鍊庵場將
倣五臺山師子窩例荆法海禪院宰官鮑山甫于中市
首疏以倡一時縉紳響應而徒侶遙集者幾百人庚戌
首夏余從黃貞父至由天海新道下法藏上人逆余於
石幢峯則庵之脊也指硃砂洞在左峭壁間草蒙茸葉

生泉濺濺出北巖高處隱隱露樓角殿楹狀法藏云此
空相寺也夫非廬山竹林之墟耶作法海菴緣起

天海庵緣起

吳士奇

丁未秋八月余同兄伯成弟平仲侄于夔雲將爲黃山
遊從湯泉逶迤上四十里抵天海秋山氣爽三十六峰
析爲千峰峰盡削成雜以雲物獻狀益幻石罅松枝低
拂如蘿翠色蒼莽獨東面遠矚大江如帛委地夜宿草
舍如吳中小艇以趣入蜀未盡探奇明年歷嘉州登峩
眉緬懷故山勝不減此而噴巖過之自僧心月上人闢

石爲級纔可受踵而苦無息肩所級行日四十里足能不茹雖有勝情卒憚攀躋卽今稱勝者亦僅一仰止窺其藩耳會攜李徐立仗同二客來余再與俱游則以心月上人往躡磴十五里而徑窮假宿蓮花洞有僧貌偉而捷踴詰朝引諸客穿峽上余病不能從居數日黃貞父從武陵來自是游者踵至然穴處縉懸跼險如舊樂又疲也於是心月上人請繕故道置蘭若天海山半別有小憩而景伯者余家小阮也則從旁贊之余惟峩山昔僻登叢今名震旦第一則僧以也按黃山圖經高一

千一百七十丈於蜀其東西皆手順茲山靈須借佛力
頃僧普門欲建場山中心月上人更築室其間總開不
二之門誰生我相共施無量之藏贊諸善緣居士不厭
遊亦無常住近逃禪然不習禪豈其佞飾而託此老焉
天造靈區必不終閟顯者有待作者乘時願徧告善知
識藉力大士長爲軒轅道主

前題

董其昌

方域之內獄有五封有十二黃山不得一焉未爲山靈
羞若夫天台有興公之賦石門有康樂之詠匡廬有青

蓮之諸終南有盧鴻王維之圖黃山亦不得一焉雖秀
甲九州不幾小缺陷乎有心月上人捫蘿披棘撥雲破
荒有奇必探無高不陟於是選勝之流稍稍繼踵自開
闢以來便有此山至萬曆之年乃始得路柴桑翁云靈
踪閔千載一朝散神界不虛矣上人且誅茅築室安立
道場使山神受戒聖僧駐錫諸餘遊子亦可夜則襍被
熏則扶筇以極駭心洞目之觀甚弘願也非夫與煙霞
結緣爲人天種果者誰當成之哉果其成之將有鵲驚
人詩搔首問青天者天子一日采祠官議列之羣望五

獄可六也

前題

姚文蔚

吾友黃儀部貞父以今夏陟險游黃山曰非此險不足
償此奇也貞甫宿海子茆庵中大雨三日夜不止羣從
僕夫趾錯其間如蚊蚋耿耿聚於一器亦良苦矣貞父
顧沾沾黃山之勝不言所苦從臾予遊甚力余以十月
來遊風日晴暖茆庵一宿月明如畫上下山中九日無
纖埃翳蔽峰岫歷歷盡呈色相雖亦陟險而探奇更多
可謂徼天之幸然天幸不可屢徼則心月圓築宮開道

以棲僊真快遊于良不可少矣董太史善推事理所必
至曰天子一日采祠官議列之羣望五嶽可六也此語
將有時而驗然吾不以此爲黃山重者嘗之見王喬葛
洪之爲令也語之曰子勉之不患不至宰相斯言也果
二公所樂聞乎黃山自軒轅以來閭閻隱秀爲真僊窟
宅世或不知有此山或聞其名而不得至其域如蓬萊
方壺第可想像彷彿信乎非此險不足保此奇也一旦
心月懸空挂壁鑿山置足剎通鳥道好奇者往往而至
於是摩巖怪松不得保其千歲之壽者多矣今且築宮

開道易險而平則游者日衆游者日衆將鵲宇題名歷
崖刻像種種剝剝儕於白嶽而後已彼山靈亦何樂乎
此哉故嶽有六吾不爲黃山屑而爲黃山慮也吾願心
月先礪二石大書淡刻吾言一置祥符寺一置松谷庵
以誠後之游者庶幾軒轅氏得全其鼎不至天雨粟鬼
夜哭矣謂心月爲黃山功臣固宜

蓮花庵緣起

潘之恆

邑人鮑元則買地創建蓮花庵在藥銚坑之上徑三折
而至寬廣數畝桃花澗遶其下左隙地爲淨林居黃儀

部貞父倡立後爲華嚴閣內藏華嚴經十二部又方冊
十二部門對獅子峰天都蓮花鍊丹三峰聳峙如列障
然清夜紫氣凝聚每發靈光南出接雲濤庵幽邃復絕
東徑宛委由桃花源梅花墩穿石磴攀藤蘿鬱鬱蔥蔥
遠勝武林三天竺之景印我上人實有開導之功焉

黃山興造大律主一齋大圓和尚全身龕塔緣起

崇禎十六年

程嘉燾

今上十四年冬惠主嚴下令內臣護送律師一齋大和
尚又命其徒日海學者待行同赴黃山雲谷禪院啓建

千佛道場延高僧四十八衆薰禮懺法又請僧講演毘
尼大和尚選日登壇度衆於時各郡緇白男女老稚遠
近馳赴受戒得度者不下數千餘人其日山谷震動香
光照耀愚迷醒怖涕淚踴躍得未曾有一時見者聞者
靡不望風渴仰翕然丕變大和尚梵行森嚴慈悲深廣
其教不言而驗其化無爲而成惟茲黃山勅額護國慈
光寺普門大師示寂以來法嗣久微大工未就宜有大
德者以興隆其法由是邑中檀越士夫咸齎贊辦香除
治律堂敦請一公和尚居之而常住大衆願推其徒心

空海學總領其事自後十方四衆接踵發心凡宣杭之間吳越之境歡喜奔奏設齋獻供殆無虛日而和尚以慈心爲甘露門密行爲化導師能順機策進隨方接引普門之大願弘緒勃然振舉時年春秋七十有八或晏坐之暇經行山麓出山門之右徘徊白龍潭井井之上巖岫軒豁澗谷朝揖風氣宜固忻然樂之曰他日吾將委蛻於茲丘乎僧衆聞者遂於其地下日鳩工啓土琢石起建塔焉闡境善信鉅家富室咸爭布施自阿育王爲釋迦如來造塔八萬四千以來歷代祖師皆起浮圖

骨塔藏之名山海內山川之雄奇特拔者往往載諸山經地志如各鍾靈效祥以表菩薩報身涅槃之地而高僧古德有先爲授記者非偶然也黃山自古軒皇浮丘修道昇僊之區普門大師奉歸全身起塔勒銘於方丈之右今建造大圓覺靈身塔於山門之陽他日香光亘天祥雲彌谷鬱蔥馥郁於天都蓮花之麓望而知爲人天營造靈祇守衛大圓靈塔之所在也和尙名性壽實慶府邵陽縣人其前後臨戒壇登律座若干會僧尼得戒者若干衆兩京行化者若干年以俟銘塔鴻筆云爾

續爲讚曰卓哉獅王毫分海宇梵網提綱千華教主闢
闢巒峰弘垂天雨濟濟繩規瞻不遐通丹日流光潭龍
固乳躍兮潛兮孰能攀覩鑿兮穿兮孰能酬爾太阿之
精雄耳之髓

普門緣起

潘之恆

余過法海庵法藏開士語余普門禪師之號普門蓋定
自五臺山在澄公精舍受其約束至今無易請得從法
海建二堂如五臺行之居士幸爲之倡余敬諾爲刊布
普門品於首以澄公例繼之而用無門洞五緣書名咸

次如右作普門緣起

一入社者各授此冊每日三時誦普門品一遍或三遍七遍竝誦佛號一百八遍無定數

一五臺舊例入例奉行不敢增損但增到會例一款願附社中者量出資若干隨一兩至五兩皆得列名社中如不願者不強亦不得列空名以防濫進一用無門洞例五流同源令各從其類以相安俾無譏議實會而通之初無分別心也衆宜諒之

一普門社建立養老延壽二堂如五臺山例入社出

資書名五緣中權付主天都社者料理俟二堂已完得人主持卽交與之

一天都社卽普門外護除二堂人不以煩累惟從五緣至者俱合作供

疏

法海庵疏

鮑應鰲

蓋聞域中靈勝之區莫非禪窟佛子津梁之處多在名山故訪至道於崆峒識神人於姑射坤珍法寶瑞不孤興奇嶺精藍合則雙美自乾坤開闢以來乃有缺事不

修如黃山者黃山倖在新安奇秀甲於寓內周環數百里亘地摩蒼歷落萬千峰爭霞避日呼吸殆通帝座刻削疑有神工一派靈泉長洗衆生塵上千年丹井尙留軒后藥爐片片青瑤望迷七聖林林碧玉到處諸天輪囷虬蟠出世間妙相嬰鳴樂雅吐人外希音誠欲界之蓬壺靈真之窟宅也久虛金刹殊負寶山高入勝士以登臨至者愁風雨之如晦行脚頭陀爲修淨來者歎鶴鷄之無枝振古寂寥新占氣象頃來蔥鬱屢見光明爰有普門禪師者荷法清涼山中飛錫天都峯下形骸土

木一似拾得寒山根性菩提頗近雲門雪竇修大乘法
願生生世世普度無窮放般若光將剎剎塵塵渾成一
片於以鍊魔選佛因而薙草開林接十方人苦身淘汰
持萬種行畢力薰修似此戒定慧互融真稱佛法僧三
寶願力互感垂三載而頓集諸賢機緣自來卽一時而
肇開勝業資檀那力助廣大緣無分達官長者不論近
處他方向萬壑中同開大千世界於一捨內永種億劫
良因謹疏

前題

于玉立

以山靈勝甲於天下然爲游客棋簞之所寓而乏寶坊
化城高人勝士至不能庇風雨斯亦名山一大缺陷也
有普門上人戒德精嚴慧光圓朗八風不搖千江俱映
以自在身而備嘗諸苦以無求法而利濟羣生是處家
山鳥飛無迹此方瓶錫雲會有緣爰建法海庵以飯十
方衆將使梵唄雜於松泉草萊化爲金碧以晨鐘暮鼓
結清淨因於酒社詞場開般若路允矣難遭善哉希有
余方行役而友人鮑儀部爲監稱其事若於此放過將
不免有寶山徒手之悔因發行橐之強半以教貧女之

一花蓋余從紫柏老人甚久頗嘗聞無上之旨念衆生
沉迷顛倒流浪生死無過一執而導師破除開滌清涼
熱惱惟有一捨捨之捨之至於無所不捨而人法兩空
一念不起則大事了畢直下與諸佛齊肩失利根男子
尚能忘崩宇宙將坐斷生死則請從捨之一字入

勅賜黃山慈光寺疏

湯賓尹

黃山以黃帝得氏者也凡山之生必與天地俱不爲不
久冠之以古先大帝德爲聖人尊爲天子開山主人不
爲不大然億萬年以來祠官不列刹宇不嚴問之數十

年前而所爲緇廬遊杖尙一踣躄於巖壑巘鄰間未聞
幽探互覽者爲誰氏也何茲山之善藏也庚戌賓尹在
京師見一僧號普門者出所爲法海庵疏云矢爲茲山
建一刹塲賓尹爲作四言引佐之曰黃祚必復其在茲
乎未幾黃山之名徹於官府天子勅額慈光爲聖母祝
釐至給所板大藏經護持之草莽臣藩之恆疏記其事
而賓尹適來遊問度經之所甫在鋪伐蓋聖明之世大
道弘敷凡域中諸名山悉荷寶藏鎮固久遠然其先皆
有殊塲顯刹爲之因依未有不階寸基尺椽而能豫邀

寵靈者也古今神聖顯懿之主必首黃帝萬斯年而得
今天子兩聖人爲茲山啓土可謂開闢大奇絕事往傳
茲山爲黃帝修鍊之區藥池丹竈具在焉導養之說明
聖所損不舉而集靈輯福天子所以壽聖母者天下臣
庶歸壽天子無疆祝嘏明享不無茲山是賴夫然則茲
山土木之功亦臣子之所宜共效也已

爲慈光寺募衆疏

岳和聲

粵有普門行人誅茆黃山經五六載七尺單前猛加纏
繡遠近從之法侶環集因念茲山自軒轅鼎成以來幾

千百年神異之所窟宅而日浸月長蓁蕪萎翳徒令巖巖邃壑幽淙絕澗之勝委諸豺虎之咆哮與蛇虺之縱橫而曾不能與五臺少室四大名山分炷香粒鉢之供無量劫來誠爲缺陷當吾生而遇此山誓將構十方殿供十方佛說十方法建十方堂安十方僧化十方衆不虛此山以不虛此生齋大誓願來於京師適有七層寶蓮四面毘盧如來佛爲大內所施造滲金莊嚴計且訖工安供處所適未有定偶遇常侍蔡公欽以屬付緣啓奏獲請光音自在運邁中天甚盛際也復念以爲旣供

是佛將說是法以安是僧而貝藏未備珠林何藉於是
一時宰官居士緇白衆道各弘誓願欲爲普門行人再
竣此役於毘盧佛前作大供養而適有平谷耆老左相
者首捐橐金三百爲都人士倡凡在會者靡不容嗟嘉
歎以爲像季以來根器秕薄信心者少劣緣者衆慷慨
好義有如是老是豈偶然夫非毘盧如來之像之靈與
黃山幾千百神異窟宅之勝普門之行之願奏發激合
何以啓信動衆不謁而得不謀而同從此迷聽者響臻
通觀者鑒赴哀浮生之有餘資累劫之不足種法眷之

善因證薰修之正果頭目腦髓寧與金珠寶玉較親慳
緣惑障寧與財法樂施絜志者哉於是法法居士偶而
疏之以告雄力慈悲誓報佛恩者惟茲大藏文聲聲靈
伽音二十五圓通耳根實圓滿將此奉塵刹十方聽無
遺千二百功德心聞斯爲最苾芻苾芻尼索迦與斯迦
一葉千百葉一弓千百弓財施與法施字字寶珠林自
施與他施函函白淨識鍤金暨焚文大小成勝智縑細
牙檀等工作裝潢資絲絲與粒粒悉湛寶明海稽首告
大衆供此十方佛稽首告大衆供此十方法稽首告大

衆供此十方僧所募匪普門爲我大衆故

黃山募冊疏

方士亮

吾聞諸遊衲云嵩華九子匡廬諸山奇秀皆不及雁蕩
獨黃山雁蕩雁行或謂過之山著藥銚藥臼諸跡鍊丹
硃砂等峰蓋神僊宅也有普門上人者從苦行得悟偶
入黃山似定中時曾見來誓爲此山攝入佛門子子數
千里徑入長安破衣蓬首赤脚雪中久之稍稍有知者
會聖母造七層四面毘盧佛及諸大菩薩金像將於清
涼峩眉南海三大名山卜所適後復益以黃山傳聞當

神廟與聖母中宮三拈皆黃山隱也遂決意以經像歸
黃山賜寺額慈光特差中貴人馬護行至則茅庵敝陋
經像無棲中貴人歸神廟爲置一緣冊上及各宮俱有
批助助且數千金普門還山好事者稍稍集調土界地
創鍊魔堂齋閣香厨廳具體而普門遺矣遺言再來了
此一局顧見在人何爲而必待此再來者然慈光遲至
今日七層金像分置茅茨何時可合貝葉瑤藏徵損加
豈何能久待山中諸僧守經像忍饑不忍去前年大祲
粟不繼徧山長竹實供數百人數月食山靈佛力日幾

聖

庸別議若所指普門塔爲乃老人拳鳳形大盡閃此
奇穴且到頭有脚有口理宜坐乾河巽庚辰庚戌分
金東北石臺宜構一榭爲施食場額全局也白普同
塔爲進里許有石指三四形如佛手其峰限石抱徑
餘泉環宜結團瓢由黃土嶺南二里有一小支磊落
而下兩羅凌空砂盤水繞胎乳垂面有楊徑路分而
無礙前有天生覆鍋金形成胎作案外朝蓮花庵主
山峰頂此宜作癸山丁向子午分金正得天皇正脈
或以白衣大士或以玄女天尊或以軒轅黃帝鎮之
其後叢林大興俱賴有此若望白衣像應龜胎案脈
爲求嗣者響應亦一說也然上二跡皆形家之言恐
不足憑俟海內高明登覽將朱砂庵殿宇房室陳列
則上呼下應左盼右顧便知真境靈區乃遺珠一蚌
爲山子剖出矣

萬佛同力疏

釋廣漆

普大師從京師齋奉欽命四面七層止盧萬佛寶塔兼

領欽賜大悲金像并願佛一十二尊龍藏一部大師發
願聖恩隆重當弘施福澤利益萬民沿途不行勘合恐
騷擾驛遞勤苦不善心人易生嗟怨惟願信善士庶各
起瞻仰志心自輸已力或一名十名至百名騰歡喜聲
歸菩提路業從河西務附糧船抵浙江杭州府茲由北
新關至江口三十餘里分日方至挽三百灘頭越千萬
峰頂其工費又不貲力惡不出於已而萬姓功德俱霑
無量所謂帝力何有民心樂趣而慈悲大願靡不周圓
敬布大師初念如此惟善信君子亟圖之

建蓮花庵疏

袁黃

余從具區如雲棲院謁蓮池老衲遇客僧焉竊有意其
爲人遂與語言言心印恍疑澄釋身化者詢之則法號
印我新安黃山僧也夫新安山水甲南邦而黃山實最
神秀天開世傳爲黃帝昇遐之處真人佛子往往遊化
其間余曾至是都竟不及與此山作一面相識余見笑
於古梅諸老矣越數日特訪之授余圖經一冊其中山
境宕蕘奇恠萬狀雖鸞嶺桐柏曾不是過因指一處示
余曰此唐時湯院遺址也面對天都青鸞芙蓉蓮花鉢

孟諸峰環列左右其下白龍潭在焉山僧將拓一袈裟
地爲駐錫之所余謂上人半偈心持色空俱淨三十六
峰皆其窟宅矧新安多善男子卽地布黃金不難再見
祇樹園故事乃上人願作平等觀祖如來乞大比之意
遍募高賢徵言於余余足未履黃山無能寫黃山之勝
聊述其相遇始末而以蓮花庵名其居

募造華嚴閣疏

黃汝亨

黃山峯壁如削玉巖岫如錯繡累高無際出奇無窮海
內名勝所絕少友人吳學憲每向余讚歎云豈有此理

語似涉戲足當此山知已然而斷崖懸磴風霧作苦人
煙佛火望之曠絕學士懸於三過衲子不堪一宿亦豈
理之所有也余登臨快暢爲此不無缺陷之感有蓮花
庵在蓮花峰前天都峰下因得過而小憩坐木簾聽飛
雨斯亦林中之殊勝樹下之極樂矣而庵右有地一方
峯環壑抱羣勝所集庵僧祥公持律食淡山靈所依誓
發弘願卽此地構華嚴閣一座焚修朝暮上爲寶雨下
列繩牀山屐可棲行鉢斯托可謂造無起有肩理荷法
者矣然世人種怪旣茂布金匪易誰爲長者猛發捨心

見作隨喜聚沙爲金猶勝撒手無將寶山空同者也余
勝具未敗他年過此當爲此名山焚瓣香望其人而拜

一鉢庵疏

潘之恆

寓安上人雲棲蓮池大師之神足也與雪峯間士同祇
事者有年因習止觀居張公山久之慕黃山勝蹟結茅
丞相源之中源間汪氏舊築二館在擲鉢源中將興三
教大事願借一袈裟地爲託足謁余友汪圓南丈與之
謀而許之會圓南南遊未歸上人思一葦爲建刹竟其
義云何而必俟檀越爲因循則以不堅固軀而望金剛

不壞座恐未易逢勝緣乃取材於儲取陶於積取力於
工若傭不數月而拓基建宇歸然於山谷間乃始告諸
文學爲旦夕資給計又走而告諸不慧爲贊協計余笑
曰何亟也是安用募哉吾聞圖南之先公嘗與同志結
社攝養此源修黃帝性命之術而圖南以理學著聞爲
後進領袖則講業弘志必於此地爲歸依吾向者與圖
南同席聞鄭子榮之論將有意於茲舉而謙讓未遑蓋
其慎也是安用募哉上人唯唯退而工傭賈餘勇不能
罷蓋庶幾聿觀其成而擅越猶未之前聞也其志不亦

可嘉也哉庚戌四月之四日余甫至山頂禮如來因頂
禮上人能發如是大願而勞苦之遂定菴名曰一鉢而
爲疏以告檀樾其遲遲而慎之者爲得人也今上人其
人矣基可因矣擴之則爲垣爲鐘樓爲山門爲禪院頃
我同流於茲山倡華嚴大會三教圓通圖南于榮其主
也里開之士聞風感發將不召而來不呼而應矣是安
用募哉爲之贊曰昔神僧鄧鉢鉢於源上人托鉢繼起豈
其後身非耶夫千僧一僧千鉢一鉢宜有神力運之矣

前題

湯賓尹

一鉢庵額公所命名也予來見其結基拓宇爲茲山首
事大壯甚奇之一鉢不足云也而名所自起云昔有神
僧嘗擲鉢於此竟易以擲鉢於乎禿巖赤手入空山作
此許大舉止與擲鉢神力何異人顧羸力自奮何如耳
然遇如許人而不捐力相佐助亦豈有志識者哉

師子林小疏

湯賓尹

循黃海之口爲師子林建梁之辰海子自茅蓋外絕無
別宇可頓榻安禪爲僧孟遊節地者有之自師子林始
而予初入山適來與會此林其隱息初地乎倡募諸檀

非爲僧謀蓋爲士之偕遊偕隱者

前題

錢謙益

一乘開士自虞山遊三天子鄣尤喜黃山師子林思結
廬其地睡庵先生喜而爲唱導猶未能告成事也黃山
爲域中名山鳥道千尋游者至不能置足視削成四方
奇險過之而一乘獨思振錫其間道心旣猛勝情亦具
非惟學人之壇宇抑亦游客之津梁已登山着屣與按
圖臥遊者幸各捐貲成此勝果

圓通殿疏

潘之恆

一乘師居始信峯三年其室僅容蒲團從師子林晚課畢雖昏黑雨雪必獨躡峯頂無生恐怖亦無顛蹶之虞聞初開基至接引巖攀松枝懸度足履爲不誣余所標定空室是已丙辰夏初師別余還海處屬上足霞光代稱林主檀信遙慕皈依室前者日衆爲置飯僧田於芙蓉庵下余題曰松林又募梓檀觀音大士一座供奉於平岡去定空室南下數武巖頂峭稍行過閣盈丈廉廡各深二尺四面翼之覆用鐵瓦承圖堅固須布給孤金乃能圓成功德室中彌勒佛像虞司勳所齎供者當爲

證盟願共持不退心同登頂地與初乾慧流接此爲進
修第一義矣凡我海會諸善信宜共竭之萬緣非多給
孤非寡鐵瓦非重莖茅非輕方丈非小虛空非大身入
無礙斯爲圓通因以名其殿而宜疏於同緣者

修建光明藏疏

汪應慶

予讀書丞相源闢光明頂下有光明藏一日浪遊至止
則插枝爲垣剪草爲蓋室卑闕而莫覩柱欹倚而莫支
信宿其側一夜見山頭放燈一夜見海中懸燈若起若
伏可望不可卽其外境之光明乎智空上人跏坐毫無

事事其徒覺然口誦楞嚴不輟間語余曰萬法無法惟
見妙明真心其內境之光明乎噫此所以爲光明藏耳
予知黃山僧惟智空第一人而以行願爲初建夫復何
難智空曰方若壑曾肯肩其事不欲煩也予曰將往代
煩之借食兩日僅供麪飯絕無油鹽且聞可餓五日七
日亦復何苦智空曰吳瑞生嘉賓曾許供給不欲索也
予將往代索之互對寂然小叩鏗然隨動取靜觀鼻
端曰此妙不可說不可說最惡者數字句炫耳口徒博
名高也何故且曰予九年禁足而持疏浴門素所羞稱

吾不必作也予起曰予願作也將往代求之覺然又可
佐成之雖然智空之高不以光明藏光明藏之修不以
智空惟早畢其修共成其高適不虛光明藏

覺海庵疏

覺海庵卽光明藏

潘之恆

海子三峰鼎立左天都蓮花若夾輔而鍊丹稍右翊之
累空纍纍可攀越而乘也據其勝而稱尊者曰光明頂
游入窮丹臺而俯巨壑謂奇觀莫尙矣於是歷三海門
繞飛來石循故就新躡仄磴摩礧松見月岩表於絕頂
躡而四望左右三峰所不必言南引雲門躡師若案連

蓮而東五老總總若會茲上指蓮花倦燈洞炯炯雙瞳
窺三源合注消搖溪口北戾石筍紅森然作殿西瞻翠
微峰倦倚若可飛度此光明頂之景於海子者率諸勝
而可指顧盡也力竭思憊有招隱庵在其麓三輔智空
禪師棲託其中十五年結跏趺坐未滿百步之外忽從
世尊兩足輪放大光明初見日華於天門黃立龍王于
凡見之次見光於西明僧一乘從師于林見之次見燈
光於飛來石海門諸毘汪魯望居士見之次見佛光於
二洞門史孟麟宰官見之次見塔光於月塔之上馬常

侍與普門師從沙嶺見之其光四飛皆本於光明頂而
起佛兩足輪豈智空師靜居十年後而得此瑞耶因讀
華嚴經光明覺品所稱世尊坐蓮花藏獅子之坐放百
億光明照三千大千世界爲十佛刹教座教菩薩所共
圍繞其大菩薩名文殊師利所從來國謂金色世界本
所事佛謂十智菩薩今智空欲空此一切世界而猶建
刹於此頂結緣於善知識所稱智力得矣謂空相何智
空笑曰顓公將以庵居爲實而瑞相爲虛耶瑞相雖幻
終古一呈法所秘也庵居如寄刹那隨滅化所顯也此

皆梵天妙明真境不可思議惟空實有乃挾秘藏在額
公何校量哉爰易招隱爲覺海庵因覺然上足持鉢過
里重宣魯望之意以屬吳方諸君子踐宿諾焉吾見佛
光交網於兩月塔間矣

翠微寺募建千佛樓疏

湯賓尹

翠微寺踞黃山之麓唐麻衣祖師道場也師從身毒駐
錫於此山冬夏衣麻丐其一絲者輒能已疾信神僧也
宣宗時盡毀天下寺宇師有出山一偈達禁中嗣詔還
山復歸斯寺至今香火不絕其下爲宋文武鼎元焦濟

甫晦甫兩公之裔入丹臺登天都盡摩三十六峰之勝
則翠微寺其初地也寺經數百年迭有興廢去歲遭洪
水衝潰寺僧本是發大弘願復開斯宇規模益擴於曩
時偶跋涉北遊遍參名利歸而欲終斯果乞疏於余將
以募之十方善士余嘉其志且重其請也爲書數語識
其本末

大悲頂募鑄金剛般若鐘疏

汪道會

竊聞玉律傳秋聽鏗聲而知寒節鐵圍長夜間金奏而
脫火院汝鯨魚擊而蒲牢鳴盡大地之傑介昆蟲皆爲

翹首矧龍藏開而雷聲吼波重閣之囹圄狎狴詎隔慈
心固知母感于吟靈應之機不爽是以循聲滅罪滌除
之理非誣信臂吒爲冥福之資鍵椎有解脫之利也惟
我黃山莫茲赤縣軒帝之丹爐猶在崑崙之幹脉攸鍾
地勢表三天于都松齡比五大夫秩鬻峯幻起峻削裁
自天工巖洞迢迢詭異潛通地肺雖七十二君滿封禪
之典實百千億載閱神秀之區迺者普門大師振錫遠
自五臺挂衲來棲一壑赤脚踏殘冰雪居然苦行頭陀
殊池占盡煙霞允矣耆闇佛囑開林薤草將起鍊魔道

芻乞食參方遂得微恩京國一瓢一杖一笠見之者生
敬信心不貪不恚不癡聞之者作歡喜想戒律升聞於
大內慈心上契於至尊金軀寶藏珍賜出於九重絳節
朱旛殊錫頒於萬里窮谷變成金世界事非偶然空山
候見玉毫光機緣適爾顧黎庶奉皇仁以祇役具曰輸
負可期而鐘鼓係覺苑之弘規借曰逡巡未備則講堂
鮮集衆之三通地獄靡停刑之一息非所以治幽明振
聾聵稱世尊無漏之妙法也猶幸此方樂國未乏善人
大和尚普門師方倡之於先長者于汪景和卽和之於

後汪景和者西土之給孤吾宗之善士也家罹回祿慈
母耄而被災哭顙祝融遺燬完而未燬百身捐來莫贖
哀哀九死一生雙眼淚盡爲枯戚戚寸腸千結望大力
能仁之接引拌腦髓頭目其奚辭仗者僧名碩之救援
捨宅院田園胡敢恤故聞鑄鐘功德便思獨力擔當乃
普門則謂力出於一人者其施隘施隘而津梁亦隘事
成於衆信者其業弘業弘而利濟亦弘勸居士去人我
心爲大家種平等福破貪破慳探囊各施百文無聖無
凡舉意咸歸萬善所謂聚輕成重一簣爲山以此普心

可臻上道抑有十德者徇從教千貫不爲多如使一念
皈依即使百文不爲少大不出鈞重不過石雖云先代
之規今則準以經律論藏計重五千四十八鈎囉也繞
獸華也旋蟲嘗聞鄰下之制今則取諸金剛經文共范
五千一百七十六字一字一杵悠揚遠度白雲間乍密
乍稀隱約遞來亙夜裏喚起犁泥惡趣悲號罪滅剎那
聲聞不斷晨昏惕勵能超生死在大師樹有聲之果當
得衆聲聞菩薩之護持在居士獎同聲之緣必獲妙音
聲菩薩之定力假使金錢匱竭居士一任始終佇看爐

韞輝煌無射特懸筍廡溜素旣發弘大願善信豈無堅
固心他時大悲頂上風落數聲清韻夢覺塵寰今日慈
光寺中月臨一片寒潭響分林麓且應器爲增長善根
之具遠可震百里近可召十方鑽金有感通阿鼻之神
冷可融寒冰熱可銷沸矢况姓名永鐫金石當與日月
齊光弁鬱暫入杳冥併使親疎蒙宥佛不誑語福有攸
歸不信請看魚劍苦道人須撞五更鐘

開浮溪源結茆浮丘壇疏

羅逸

貫之上人與鄰虛上人結茅浮丘壇壇在黃山浮丘峯

下昔有至者見樓臺及白蓮池左右有鹽米之積
人取之不復知所在唐始置浮丘觀至宋觀毀而有浮
丘先生廟其跡今不可尋矣惟蒼巖翠嶺競秀爭高曲
澗懸流勢幾穿石匯而爲潭溪幽莫測若有靈物潛焉
山多松樹怒枝古色陰森逼人跡所不到上人近始
經始刷石發雲疏流注月使高人韻士藉六尺烏藤一
繡屐屐收泉石之勝非上人之力也邠上人曾住蓮花
峰頂七日不火食猶念佛不輟今欲放擲鉢庵所爲集
諸檀施成述勝緣飛薨畫棟摩蕩雲濤青瑣綠疏隱映

烟海是亦人間之福田也財法並施必多其人矣

一粒庵疏

馮琬

側聞支遁買山成高隱於初地遠公送客圖三笑於虎
溪從來古德每結名賢到處精藍常依淨土維歛黥山
著稱黃海雖言佛國寶號天都奇巒變坂堪與五大齊
驅噴玉飛珠果是三洲競秀向有比丘雪峰者幼生名
族爲夙世再來之人長事空王有鑽紙出頭之偈欲擇
山頂翔立琳宮寶堂未爰業於太虛隻履忽逍遙於淨
域幸有法嗣壺林能沿衣鉢不墮宗風生死事大既行

卿以參方虎狼穴鄰亦合掌而跏坐志勤心懇考築有
基行苦力綿翺造未遂乃伊法孫智圓爲佛門龍象真
釋氏箕裘托鉢思繼前人之志布地端賴長者之金眷
此名山合襄勝事松篁竹韻時來陶氏盤輿琢句談經
還憶謝家蓮社華門巨室幸破豪貴學道之樊韻士儒
流堪結貧窶布施之果白鑣喜輸於囊角青帙爭解乎
杖頭將見灑灑楊枝是處流通阿耨纖纖芥子大家混
入須彌意珠與佛日同圓戒香共覺花齊馥水流明月
盡開翳障乎珠林山鎖浮雲悉借明光於貝葉謹疏

黃山緣疏

方一藻

如來願諸有情立權巧法總破怪貪衆生從五濁界發
菩提心最先檀施矧茲黃海風擅靈區鼎鑪鑄自軒轅
法回晦於緇素普門開士浪跡衲僧來不將一物束直
欲拈西竺瓣香薰向天都絕頂住亦非作意住偶爾就
孤峰片地見出寶剎異光七佛飛來木鳥樹林欣勝相
龍藏肇錫天魔人鬼樂伽音粵若浮丘廣成歸攝應先
山鬼一切蒼猿怪石指點何俟生公說法已歷廿年布
金猶靳丈室流泉可供枯木可巢詎令鄣山練水之鄉

香無絲毫一土莖草可化微塵可轉世使尊朱說孔之
習橫出麗蘊一宗何妨事涉有爲但取念能依淨空所
有寶珠衣祇種種佛事種種妙門盡凡心果報機緣一
一圓成一一逗見莫訝學人饒舌真懼此子波津隨所
見聞咸生歡喜能爲普門老人結未了案卽爲見在七
佛植最上因翹首同流不昧斯語

照微蓮花峰下結庵疏

程嘉燧

灰心覺五十九年之非未離火宅覲面參三十六峰之
勝初見普門豈愁蓋頭一把茅何惜出手千金帚適有

照微上人者棲雲跂石立雪餐松道骨堅凝禪心自在
得法於蓮池開士常住作舉亭主人偶蓮蓮成松谷幽
尋便彷彿記靈山舊會方欲緣崖跨壑架竹緹蓮酸措
大總倒囊無半貫青銅冷禪和牢縛肚止三條黃篋他
日還思向毘耶分座六時都將與彌勒同龕老人安知
非贊歎自己之緣敢辭饒舌大衆要信是莊嚴當來之
福卽有發心泉石實聞此言草木同諧我願謹疏

募畫祖像置黃山疏

鍾惺

祖之爲言傳也不自其身而止也使止於其身是上自

飲光止矣又上而自毘婆尸佛止矣於祖之義何居哉
祖之教既不自一身而止則夫莊嚴祖像以使之傳者
又豈可自一處而止乎牛首祖像百幅信心者多臨而
瞻禮之不欲其像自牛首而止也新安方居士欲廣牛
首祖像之傳而委之戴清之可謂得人像成而置之黃
山可謂得地鍾子方客白門感牛首祖像之裝者就淪
而國新之聞其事而歡喜讚歎告二君廣勸十方信心
成此功德勿生退轉第提祖之一字顧名而思其義焉
斯可也

引

黃山募冊引

湯賓尹

謂此山新未與天俱軒轅老子得道最初謂此山故僻
在礪土黃帝以來此秘未覩孰故孰新因天因人天有
開塞人有廢興塞極之開其開茲大伏火遺鍾精光照
夜廢則萬年與則常念一刹俄頃道場畢見募者施者
與天等長彼人開山山亦姓黃

考

黃山歷代圖經考

許楚

歙黃山圖經肇開北宋景祐間通守李公序云圖考舊
脩聊綴菲文及閱圖經盡識英華則圖經之見自景祐
不自景祐始也又五十九年嗣鐫於縣尉鴈蕩周公爲
哲宗元符庚辰又五十七年三刻於知州彥國胡公爲
南宋高宗紹興丙子又五十三年四刻於中山焦公東
之爲寧宗嘉定戊辰又一百六十一年五刻於歙縱譚
吳氏子容是爲皇明洪武辛亥紀元見白雲唐先生序
又九十五年六刻於祥符寺僧全寧爲天順六年壬午
又一百一十七年七刻於豐城李侯邦和爲萬曆九年

辛巳續有鄉先達潘石泉唐心庵嘉靖間倡和詩學博
田公藝衡碑記次年壬午又八刻於歙山人程天錫合
白嶽詩有午槐程司徒及家族祖昉陽公佐并天錫三
序自萬曆壬午至萬曆己未又三十七年而景升潘先
生黃海之紀始出自庚戌十年以來蒐討迄無虛日可
謂表名嶽之殊勲勞神皐之巨手後之覽者當尸祝其
河源星宿之自矣

有作黃山辯者言山微諸水言水微諸山相錯乃見
圖經謂黃山卽古黟山按水經注云浙江水北歷黟
山縣在山之陽言山南卽黟縣治也今黃山在歙封
域內安得謂卽黟山乎且北歷云者言水北過山下

也今黃山去浙江百里而遙則非黟山益明甚矣
唐人作蓋蒙水經注所稱而未深考耳又謂黃山因
黃帝採藥得名其說亦出唐世夫山之奇秀者如賢
人介然無所阿附必援軒皇爲重抑既矣長安有黃
山姑孰亦有黃山豈皆軒皇所枉駕耶今鄉俗稱爲
黃藥山以山出黃藥也曰黃山者省藥也地從主人
可也云云信斯言也是羅鄂州之志亦誤矣及麟嗣
詳考此未按山海經一統志而致誤經之言耳山海
經注浙江出黟縣黟卽歙縣也一統志新安江源有
四一出歙縣黟山一出休寧率山一出績溪大鄣山
一出婺源浙山合觀二書浙江源無出黟縣之說惟
汪循爲自黟者出古陽章嶺亦非黟山一統志雖謂
黟縣以黟山得名及考黟縣志縣在黟山之陽以墨
巖石有黑色故云則黟山另有一黟山矣安得因水經
一言致疑黃山非古黟山遂懸斷歙之黟山爲黟之
黟山乎况道元水經注皆謬者多獨此二語較爲無
病蓋黃山之水一由郡城出歙浦一經休寧入屯溪
皆爲浙江之源而百里內外皆可言陽水經從其大

者遠者以論其槩原未拘拘縣在山之麓始爲在山之南也黃帝事已歷七十三甲子有無難以臆斷今以黃山南文產黃蔡之一山省辭以核標點山此文人輕信翻案不必辨第引西安姑孰兩證苟未深考似不可援以爲辭西安黃山乃宮名非山名寰宇志漢黃山宮在典平縣西南三十里漢武帝西行至黃山宮卽此也晉灼曰黃山宮名在槐里按武帝茂陵在典平縣東北十七里正黃山宮之北老杜祠房詩萬里黃山北陽陵白露中蓋前茂陵秦陵非言山也以宮作山者非始孰黃山在府城西北五里世傳浮丘翁牧舞於此又名浮丘山宋雒宮及凌歊臺在其上亦不得藉口爲黃帝事黃山舊名點山天寶初改今名確乎有據續學多才者好爲考證辨難之文其中自有得失因錄原作并附鄙見如此

片

九江之南新安爲名郡在郡之境黃山爲雄鎮距城百餘里或謂之北黟列峯三十六亦曰小華言其廣也則宣城池陽分壯其趾語其高也則廬阜天目僅及其肩若夫削成拔地之體峻極隱天之勢岩巖崑崙翠嶠峴峴峯客層巖絕壁重岡屬嶺軒若龍翔竦若鸞企肅若人立伏若獸踞豁若通門挺若植柱橫亘若橋梁曲折若屏障或崇或庳或銳或平或離或合或扶或侍千態萬狀不可得而悉數固元化之妙用而神明之奧司也是故靈芝奇草孕其間湯泉乳水流其下丹砂承旭而有

茹白石冒晦以生輝陽壑吐風則春熙陰巖蒸潤則夏
懷青牛白鹿或絢質於谷中朱霞紫烟常泛彩於溪上
文豹彬蔚而下霧應龍蜿蜒而躍淵桃杏交英何必武
陵之路柏松並茂豈止新甫之材信乎綜瑰麗於羣山
極幽邃於茲地者矣所以至人慕其神秀上聖處爲真
都珠函玉壺旣錫自天之瑞紫琳碧枕爰遺希世之珍
成涿之馬跡可尋化草之龍鬚不絕久瞑而神燈出洞
照釋子之靈風清而倦樂度空感阮生之化紛然異致
歷代攸聞俾彼宏基一方斯望然其結乎氣也繚遶盤

乎地也迂迴雖奇紀之具標而常典之闕載譬夫沃焦
抗尾閭之泄靡列公封天台越魑魅之塗弗登王祀斯
所以子華陳賦而興公寄辭者也予於景祐初祇奉明
命通守茲郡始披州圖則遽見其寶集及閩山記乃盡
識其英華漱石枕流慨未遑於永託馳神運思竊自樂
於冥搜會是山大中祥符院僧行明惠然見訪袖出唐
賢及近代諸公詩示予求爲之序予應之曰詩之緣情
觀之各見其志序以本事述之宜撫其實因考舊牒聊
綴菲文用列衆篇之首庶幾慕古君子知是山之奇挺

誠靈僊之所遊化也

前題

張介

予嘗讀班史見有山東出相山西出將之說慨然歎曰
山水之感人固如此乎蓋天地之氣結而爲山嶽融而
爲河海而山嶽河海之氣亦孕而爲人是故山嶽河海
之氣受之於天者有剛柔清濁之殊而人受山嶽河海
之氣以生者亦不能無強弱勇怯之異今夫吳越之人
秀閩蜀之人峭齊魯之人樸淮楚之人直此皆其山水
所發者然也江南諸郡多佳山水其間雄絕者莫如黃

山其山舊名黥山當宣歙二郡界西南屬徽州歙與休寧縣東北屬宣州太平旌德縣唐天寶六年六月十七日敕改黃山其勢峭拔其形壯麗故宣歙二郡之士風民俗率多廉直耿悍之氣自昔異才間出賢哲迭生武烈文勲皆足以聳動朝野又信乎是氣之所鍾也然而自山至京二千餘里陸海不通舟車隔絕故罕爲士大夫所遊賞而遂泯滅於無聞雖山僧野人之居蓋亦少焉元符三年雁蕩周君來尉歙邑因按驗至山遍賞諸景於祥符寺得圖經及古今賢哲題詠以觀乃歎曰有

如是之奇而不聞於世者何也是非文字失傳之過歟
亦居山者有罪焉遂鏤圖經及詩板行於世子居宣之
太平縣去祥符精舍無兩牛鳴地因同同志訪謁求湯
泉澡滌之勝焦君東之居山之麓適與偕行寓宿於寺
主山一老出示舊本圖經歷年滋久其間脫板甚多似
不足以悅人之觀覽甚爲之惜謂能更復此集非好事
者不可焦君在列慨然有志於斯遂命工增以山圖續
以近世諸公詩詞并附於前後就屬予爲序予不獲辭
因序之曰斯圖一新不惟使前之英辭傑作不致湮泯

無聞亦使天下後世之人知此山之景而名公鉅儒接踵來遊高僧隱士比屋爭居於山之間者實焦君東之力也於是乎書時宋嘉定改元清明節日

前題

黃之望

余性嗜山水經行勝處往往心融意會自得於中不可以語人者表姪鄭震來自宛陵出示中山焦君東之摹刻黃山圖經并前賢題詠且云黃帝與容成浮丘鍊丹之地是非未暇深究每一披覽吟諷頗契余性所嗜三十六峯森然如見不覺心目行舒骨輕欲舉矧涉其

趾而升其巔耶江南多山勝絕層見鍊丹之事恐亦不
誣按其巉巖峭壁翠玉萬丈神剎鬼剎延袤數州真足
以甲江南諸山也想夫林寺古而煙霞淺潭洞杳而龜
蛇壽春濃秋淡節序生態倦靈縹緲往來其間扶輿礪
礪木石不足以當此奇也意必有奇傑宏偉者出焉宣
歙自古多名賢是山實爲之况居其麓者乎焦君享齡
彌高潛德不耀樂天無憂有隱者風果得仁者靜壽之
驗歟或謂是山非車轍輻輳之郊故士大夫罕遊賞余
曰黃山伯夷之清若有道者也豈以遊賞爲之顯晦哉

余無意見黃山之真面目披圖玩句亦足以發余愛山之懷時嘉定戊辰春

黃山圖經詩集序

唐桂芳

予嘗讀禹貢一編豈後世輿地圖山水經之比也觀其規模次第治水曲折何必研丹吮墨然後謂之圖哉先施以經文如化工史文如畫工蓋大禹告成厥勳凡操觚左右者是亦聖人之徒也故尊之曰經而謂之化工史則紀述其事而謂之畫工信不謬矣天下之山磅礴綿亘皆起於崑崙水則伏流地中泛濫乎蓄溢而爲黃

河此山水之源委也江南諸山之大有天目天台天目
高一萬八千丈吾州黃山僅一千一百七十丈而天目
反企於黃山何耶以地勢度之錢塘迤邐潮流而上尾
蟠頭轉爲灘三百六十黃山爲之上游雄拔最高視列
郡之山殆若培塿然湯泉閤靈孕秀清泚香滑支分派
別東南導於歙北達於宣南潄於錢塘又南會於睦過
大鱗入於衢自衢之西浮於饒至舉根西北逾於貴池
足其餘波也識者目爲小崑崙雖不經見而周書異記
謂黃帝至是問道於浮丘翁受胎息於容成子至今丹

龍棋局駕鶴之洞浮跡之石宛然猶存按黃帝都於涿
鹿校黃山相距數千里未必棄萬幾之務途高引之舉
而於望僊擎頂乘龍上昇又與鼎湖天山之事不侔得
非世人好瑰嗜譎傳會而傳之歟不曰黠山而曰黃山
理或然歟郡西吳君華祖字子容號庸窩讀書崇道雅
志幽閒續集黃山題詠洪君舜民復繪爲圖用傳於世
一日其孫匪橐是集邀予序予憶童州時獲鄉先生吳
公古梅鮑公魯齋游黃山記喪亂之秋精神衰耗其三
人予失之矣因憶其時海宇寧謐財物豐阜而諸公得

以遂其幽懷逸趣乾餼肉脯每至懸崖峭壁必長繩牽
挽而進遇佳處則畱連忘返其雄豪有鐵笛一聲天未
曉吹開三十六峰雲之句刻于容於古梅生同時居同
鄉則是集其亦聞風而起也歟予生晚不得侍諸公筆
硯間觀茲盛事輒以先公筠軒先生溫泉歌并汪公古
逸王公仲履數首用充別集匯字德淵力學有詩聲幸
有以卒其志無忝爾座云時洪武紀元辛亥冬

黃山題詠序

方勉

新安山水遠勝他州大好之稱見書梁史而黃山實爲

詠山之宗按郡志舊名黥山又曰小華世傳軒轅黃帝
常命駕與浮丘公容成子同遊鍊丹於此故唐天寶間
敕改今名山去郡城西北百二十八里許高千一百八
十仞有峯三十六水源亦如之谿二十有四洞十有二
巖則八焉山高而靈雷雨在下若僊橋月塔飛布湯泉
類多靈迹難以數計真神僊窟宅寰宇所無而僅有者
也宜古今指紳大夫士想慕登游咸有紀述以詔後世
昔祥符寺僧文太嘗彙舊著黃山圖經併唐宋羣賢所
賦詩什板行於世久矣今住持其寺僧曰全寧棲身城

西之景德寺總其綱者以師飛行精專機鋒慧敏故俾
住持師於禪定之餘遂以舊存黃山題詠質之邑儒鮑
君庭謚程君文實汰其蕪而存其佳者釐爲前後二集
銳意鈇梓以永其傳且屬予妻兄汪士進走書請敘竊
惟天下山川皆本崑崙而黃山諸峰遠祖其脉蓋自西
北數千萬里來入江南攷之故典黃山不特爲新安山
水之祖而且爲江左列郡諸山之宗若九華五老天目
天台原其肇迹皆本於斯金陵武林古今帝王都會黃
山脉絡實相貫焉彼未悟觀山之法當自本及末而反

以前說爲荒遠不經姑卽其近者言之茲山靈秀不但萃於物又有以鍾夫人故自漢晉唐宋以來吾邦生人或爲名賢碩儒或負忠孝節義觀其文謨武畧提兵捍患或受薦登庸或恬退著述皆有輔國濟民之功成已成物之譽載之簡冊崇於祀典昭然可欽矧於隱逸修鍊茲山熏蒸服食其靈氣之久庸有不却疾延年輕舉神化以繼夫往聖也哉雖然有理存焉人但知此山與大相爲悠久而不知其所以生育於無窮者皆本於一理二氣流行而不息也非知道者孰能識之予不靳復

以是意析爲十詠俾附集後覽者詳焉

遊黃山卷序

程敏政

予往來家山二十年恆思爲黃山之遊不果弘治丁巳
子月之三日至郡城決策往焉府公僑侯及士友期同
行甚衆值冬霖不止有輿至潛溪而返者有進至楊干
寺一宿而返者惟清流時習鏡山三人任予甚勇冒雨
行兩日抵湯口陰晦四合微雪交下予亦索然以爲不
可登也至山麓雲氣忽晴稍雨崖重入怪石參差飛動
橫亘三十六峰山沒天表湯泉沸石屋之下而嶺外石

潭古木陰翳有龍宅焉其境幽良其狀偉絕四人者相
顧愕然疑不類人世乃小憩祥符寺留四詩出山又明
日清流作長卷請並道中所賦者各書一通或疑黃山
之爲景也非太白之句不能當其勝非摩詰之圖不能
盡其變顧此半日之遊僅見其一二且短章寥落若此
惡足以自侈乎是大不然譬諸嘗鼎食者得其一鬻餘
品可知所得益新則所飲益甘若盡得之終身之頃無
餘味矣然則茲遊特啓其端耳他日謝事還山褰糧而
來分榻而臥希塵外之高蹤續古賢之逸響必有其人

以挈予而名後世者若今所得則亦出於一時良會不
可以無紀也清流爲于明文遠時習爲鄭鵬萬里皆予
友鏡山爲李汎彥夫從予學旣遊之七日篁墩居士程
敏政克勤父識

募刻黃海序

李維楨

劉中壘敘諸子凡十家班氏詘小說家是爲九流今歷
代小說自盛行而十家書獨黃帝無所不備其言最無
稽最易溺人友人潘景升因其鄉黃山作黃海搜葺黃
帝事畧盡矣可以博古可以窮理可以反經可以解惑

是帝之功臣也卷帙浩繁繕寫劖劂非韋布一夫所可
辦敬告四方同志通力合作用補墳索之遺爲藝林增
一勝事今細民婦孺捐施金錢行貝典梵夾者何限吾
輩於是書忍弗能予顙定有泚海不擇細流故成其大
敢以發鳩片石寸木爲先導焉

黃海序

畢懋康

黃山峻極延紆宣城池陽浙江若分以壯鼎之趾匡廬
天目高蟠插天且俯瞰之曠乎江南大觀也元符周尉
鵠圖經詩詠而其山始名前此未聞則不託於文字之

故也山史性嗜山每經行必標名勝黃山烟霞協趣結
侶非一朝矣海內名人或訪山必以山史往踐閱歲年
攜撫不一於是作黃海其志境地則三十六峰之瑰獻
詭效連巒交嶂洞杳潭深僊樂聖燈或聞或見志僊聖
則軒皇命駕曾浴湯泉珠面授衣浮丘題壁香林毛人
東國神僧與夫容成曹阮之流志物產則白龍青牛朱
砂紫芝水怪山精靈林殊草幾駭人間之矚而窮緯牒
之奇志幻緣則鹽之積米之積石上之暮局雲中之歌
聲蒙蒙滅景昧昧遺形志遊而則鄰枚上客揚馬俊人

或賦桂樹於招隱或挹高風於遊僊蘭敷玉響莫不采
之綴篇蒐其高韻蓋考之圖書求之志錄集之千家萬
戶之言富矣山之觀備矣故其書亦名黃海翁之乎金
海玉海之錄固作者意也雖然是書足以名黃山而山
靈未必欲以是書聞彼向之所幽棲者僊靈今之借徑
者則多與俗遇也齊諸志怪裴劍傳奇夫亦自成一家
言效古以藏之名山者乎山史爲潘景升一生沉酣黃
海潏浪中當思遊無何有之鄉以處壑壤之野茲且厭
世而去當乘莽眇至帝鄉矣

送陳大博遊黃山還詩序

趙 汴

徽之黃山巨鎮也北倚九華西拓彭蠡南接廣信諸山
其東左挾浙河右起桐汭以盡海壖要皆支隴所分謂
其隕然中居以降勢委和於四表有坤道土德焉故名
之曰黃山然其上則連峰極天巖岫深窅下則重岡複
嶺斗絕環周雖土人有不能遍求而盡達者故自逕世
隱淪之士咸樂居之或以爲由軒轅得名者近古所傳
也邠非會通之地四方賓客無因而至獨唐李太白嘗
一遊其間爲之徘徊而去遂無復躡其蹤者由是茲山

之勝際世罕聞矣至正十一年歲辛卯夏四月浚儀陳
公子山實來游焉始至風雨彌月而山之主僧適遠歸
亟率其徒以先導晨發郡城出西郭明霽開豁郊原穆
清旦日既盥始遵其麓潤淙淙而激流易涉林如畫而
蘿蔓可緣若有陰相之者乃休僕人領賓從相羊乎松
隍竹林之間靈苗不揉而自芳丹泉在山而常潔德人
君子之恆操猶有可見者乎進而據虎頭之巖以下臨
白龍之湫風雲渤興雷雨將作凜然神物不可褻而觀
也乃循左巘絕大壑陟層巖登蓮花之危峰以望八極

渾渾焉皤皤焉若有見夫崑崙磅礴兼覆並育之仁然
後知茲山之大根同乎五嶽潤達乎四海而英華發揮
精爽洋溢與造物相爲流通而莫知其終始也矧可以
方隅論哉振衣下邁授館精廬信宿而還蓋充然若有
得者不知我之觀山邪山之觀我邪與吾遊者皆自觀
其所觀邪抑將同所觀於遊者邪噫以公高情達識如
斯其有異乎昔人之來者固宜彼仰首注目望巖而退
者於公所存何如也公妙齡積學已超邁等倫俄而貢
春官對大廷以第一人及第列官朝著聞譽日隆矣顧

猶遠尋名山以發登攀造極之趣則夫究經綸於功載
抱根柢於詞林者何可以淺近量哉於是郡之縉紳儒
士喜公之能來而惜其別去也繼取山中景物有名圖
志者相與賦詩贈公以寓其嚮往之私詩皆一章章十
句五言以予獲與斯遊又俾敘其事於右簡是用著茲
山得名之實極一時之榮觀以告夫繼公而來者
記

敕建慈光寺記

潘之恆

黃山之有慈光寺肇於萬曆辛亥六月二十六日今上

廣孝心爲慈聖太后斬年所賜額也先是普門大師惟
安由五臺來棲黃山用普門品行度世改朱砂舊址爲
法海庵居然靈鷲境界爲立鍊魔場非苦行安禪者不
得與嗣建華嚴堂延善知識緝誦其間祠部鮑山甫儀
部于中甫各具疏集同志士紳爲倡願願力尙未弘因
念黃山鍾靈萬古非熙朝大聖人不足當之乃負山圖
入京以微寵澤庶幾一遇爰駐錫慈明寺會慈聖遣馬
中貴齋僧盤山邀師與俱有左道人發心檀施問師於
黃山何欲師言將建立道場願得請御藏鎮之於是馬

監顏公爲乞金龍護持祠部公與同署儀部岳公同鄉
武選程公共捐俸金奏其半而左道人所助溢之爲辦
玉楮汗青慈聖青宮又續頒御用文繡裝池實爲震旦
第一部顏公復請寺額得旨曰去予藏不逮三旬加錫
帑金三百竝僧惟安紫衣幡杖時鮑大美侍親京邸馳
訊山中具悉盛典有法藏嚴公謀之居士劉聖鄰鮑升
美丁際雲暨諸善信爲度閣藏經計而力不暇翔先爲
鄣亭以遲之拓地從鍊魔場上百步許開方廣十丈地
可置堂五楹籠以朱砂靈氣足當龍樹所游若天作之

矣遵石磴拉師子項而登俯仰蹲顧各具異相題曰師
乳臺進開裂缺而衷之古松盤結如華蓋爲松石峽苔
蘚斑翠淋漓欲滴轉而左陟則大悲閣冠其巔丁居士
首倡發願協力仔肩且徧栽松十萬八千又稱社中最
勝事由煉魔場循級而下得法眼泉有石障其委使之
積蓄積一晝夜可供千僧下此數折經地藏殿左壁兩
瀑爭流界破山色勢如玉龍奔壑普門昔語余須鑿級
而躋卜日將從事焉嗟乎聲聞著於慈音萬喁響答但
金利巨麗快觀希有萬衆同情法藏端端然鶴立以希

恩臨莫知所憑藉余謂維摩丈室寧慮五十由旬獅子
座無隙安置而億萬天人衆無侍立處邪况法海爲龍
樹所依豈伊人力足恃姑爲錄記傳布山谷因緣可埃
或在此舉湯司成公將入境當徵其主盟法藏與同社
諸人皆歡喜翹佇

御泉庵碑記

鮑應鰲

御泉庵初名雙嶺其地自黃山雲門峰西來連峰數十
絕壁摩蒼至培風尖挺然秀出雲表庵處其麓今比丘
覺應所建也盤谷廻旋左右環抱從遠望之如在蓮花

辨中前峙一峰翠色可摘黃山固饒靈秀此亦形勝地
云屬歛而界鄰海陽之北舊未有庵國初高皇帝從都
陽破敵回取道過之憩松陰樹影間上與左右方渴山
巖之下泉水湧出酌而飲之上色喜名其泉施水而呼
土人語之曰是宜庵其後上有天下土人因創庵焉而
以高皇駐蹕之故免其征初稱雙嶺者庵之左右皆嶺
瞰左達歛踰右達休庵據嶺之中萬曆初殿新之復殿
覺應夙精形家謂庵向背失宜故災當於陞內稍移左
正倚培風之下而湧泉當其前始吉乃自出錢若干緡

間募木石以助而中翰吳君百昌亦出若干緡助成之
庵前爲繚紉顏其額曰御泉庵則故中丞徐公守郡昔
所題志高皇帝激泉處也由垣而入爲門門之內爲刹
東南向折而左爲青蓮閣僧寮在焉閣後則香積齋堂
右爲十方堂以待苾芻之十方來者堂後貝葉樓矗起
諸藏經悉貯其中樓後則闢祇樹園竹木交蔭結夏其
下亦清涼界也汪司馬與覺應交善最重之稱爲響山
上人余以戊午脩孟蘭會於黃山之慈光寺晤上人過
其庵一宿上人出法論相訂劬及青烏岐黃卜曆諸家

之法亦無不通曉而吐音洪亮狀貌魁傑余調笑之令
在草昧之初得侍高皇帝豈不與當昔翊運之臣相頡
頏哉觀其後嗣皆肖其賢亦上人之規鑑於無窮也黃
山蘭若有名者爲祥符爲翠微爲松谷皆以境地勝御
泉雖當衝路殆不多讓朱砂峰下慈光寺甫事興建然
以大內賜佛取重若御泉則聖祖龍興之日皇輿過化
之區坤珍地靈之秘弗宣固臣子所宜載筆也上人以
庵之始末屬記余爲著其梗槩如此庵有山田若干畝
紀列於後昔崇禎九年丙子重陽吉旦

脩復祥符寺碑記

田藝蘅

古之仕於其地而善爲木遊者莫如謝永嘉柳柳州
關古夸今剔奇括異卽所以紀泉石宛若畫圖遂使千
載而往地以主重主以地名豈不誠達人大觀也與哉
然始興瀕海龍陽瀕夷較諸新安黃山則大有徑庭矣
黃山本名黟山傳言黃帝鍊丹之所故山名而重焉卽
如所稱崆峒問道與夫括蒼縉雲之事僻在東西絕嶠
要皆懸蹄電轍之所未嘗及者當或神遊焉耳黃山在
歙西百十餘里谷幽徑遠遊者罕至日沒榛莽僅存軒

轅宮亦漸圯矣豐城李侯邦和蒞邑三年政數化洽歲
稔民熙首建 文廟飾黌舍創公館百度具興會地官
丈量之檄下因究寺之所以廢者由於產盡稅貽僧同
挂搭侯憮然閔之曰黃山以天都比於洞天溫泉以朱
砂冠於寰宇不佞奉新詔守官雖不敢放浪山水而俾
古蹟久湮勝事頓泯實不佞地主過也於是集里甲委
巡司按圖經清保牒復田土若干畝仍命其里胥曰自
村嶺石橋塘陂諸所租息爾遞年掌之以代寺賦又命
其僧能琦曰自東西段方壺黃坦湯源諸所租息爾僧

人掌之以供香火若其修理殿貌之費則取償於占產
之貲復捐俸金助之而藝衡則嘗爲之疏矣乃今山得
主而生色僧得產而奠居泉若淪而紅巖若磨而碧雲
霞絢爛猿鳥惟呼三十六峰之大觀燦然復獻奇於几
席之上侯雖雅志巖石將以衍仁澤於不竭也厥惟靈
運子厚雖善爲山水遊然鑿嶠濬谿輦築臺榭則民病
挈榼賦詩畱連光景則官病故當時不能無議焉若夫
李大夫心存魏闕之中神寄風塵之表克還故物永設
成規旣不病於官亦不病於民卽有熊氏之英爽默存

固且首肯其爲善政矣方且與容成力牧而頡頏也又何有於會稽河東二大夫而已哉余嘗雨浴湯池三索玄珠目擊道存事屬掌故不可以無紀乃爲銘曰

南國佳山肇靈黃帝丹竈鶴飛鼎湖龍逝爰有謫僊天才命世物色宜平遊蹤是寄境僻人稀風流日替莫爲之主孰起其弊矯矯李侯太白豪氣疆界均明山川煥麗澤溢方外功昭華碣俯仰神遊百千萬歲

重修大聖山普祐院碑記

汪 鉉

大聖山據黃山之麓西去歙地百里厥地非孔道厥境

最幽勝創始宋嘉定中而興廢不一也按大聖名清素
佛子緣覺聲聞之流相傳自五臺歷西峯忽以黑風飛
茅覆竹以泊駐於山頂是故山以聖名聖以山顯當水
旱疾疫之災蠱虎螟螣之患鄉人固有禱焉而答之弗
爽者也舊有普祐院歲久寢敝元至正中僧募里人謝
彌高等嘗修葺之更歷於今迄二百餘年院日就圯而
住持之貧亦特甚幾不能存僧名普智者用乃大懼募
於衆卒無以應聞溪南吳傳芳字以述者嘗不惜大費
鑿石甃路自曹柘嶺直抵湯口由湯嶺以達於湯池近

又鑿石結亭覆於上蓋千古一見而風爲好義者也乃因里人謝以光謝天成共與之議以克合吳君遂捐貲命日鳩工誅木於黃山伐石於曹溪拓其基宏其規中作大聖殿三楹前爲門屋五楹左右廊屋十楹而觀音殿在焉凡僧舍倉庖庖溜之所與夫像設供器靡一不具始事嘉靖甲申秋八月望日畢工於乙酉夏六月七日積廢之弊一旦中興復念住持者匱粥無供亦非所以傳遠之計也又捨土二十畝俾爲常住之資由是行者發偉觀於蒼山古木之間居者獲美蔭於良疇嘉

吟之上茲山得吳君而一旦煥然有加於舊矣普智感
吳君之德謀於其衆立一堂於左廊以尸祝吳君世世
勿替用報厥德亦以勸夫世之好義者礱石請予記之
夫以茲山與茲聖合靈爲斯民之福宜禮之而不爲佞
興之而不爲侈書之而不爲誣且謂吳君端慤謹飭惇
尚行誼壯游江淮之間貲累鉅萬行年七十始歸結廬
於曹溪買山數百畝將終老矣乃能推利濟之心捐所
有以成茲役視夫拔一毛而利天下者不爲與微利於
土木者有間則祀其德申其功以告來者固宜普智風

具戒行且有興廢起匿之功而知樂善報德之典亦有足多者於是乎書

天都峰代繪記

潘之恆

天都峰黃山第一峰也鄭生無著曾從蓮花庵臥對終歲作法海圖進大內奉御覽而不得彷彿一二宜丁南羽氏含毫持久竟未下點塵也余認此峰四十餘年凡向背轉仄晴雨寒暑變態皆得其神情如鍾期間擊磬聲而知其悲申喜聽乞者歌而認其母真之所形不容外索豈須效彼皴劈如畫家所施真拙子之駒死母奚

關於真形哉姑摹其數面以文代繪令具慧眼者從世外見之可爾一登慈光寺北面仰視如冕而平如胃而突如劍脊倚空同如鳳樓攬千仞諸家務廣大而失之孤峭故不類一從東天門下丞淵源復從源上石樓所見如佛輪五指乍伸乍屈或豎一指或二三指如對太華僊掌而諸家失之幻見不能定局一從金繩庵分脊左天都右僊都如鵬張兩翼各展雲垂天而挾二溟也一從僊燈洞獨青鸞擎長侍帝側已縣之洞門而諸家咸失之特立惟全體雙峙莫如從光明頂望之僞釋迦

牟尼佛與多寶佛分半坐於空中則與蓮花相向與鍊
丹鼎立爲三而鍊丹氣攝伏不得挺卓諸家失之尊嚴
宜其不克肖也吾將因風雲爲卷舒因日月爲顯色因
煙霞爲點綴一峰獨聳四望有情不必登其巔而呼吸
通帝座知靈化之無常矣自普門師甲寅九月十四日
挾縑流四三輩陟天都峰絕頂望之者咸嘖嘖驚異師
語余云余登峰自文殊臺界道履紫苔壁百仞飛躍得
度乃假猿臂貫接上十餘里得一團瓢地擬以祠龍王
有水一泓可掬擘列缺而入若緣甃升頭與石觸忽得

竇若隆隆百尺得洞豁然旁通明而躋輿積石累累然
可超距過也又上百仞見隙光下透如從肉髻頂出有
方石不滿二丈可履而竦其肩置身虛空且憎履石黏
余足不然乘風何難哉而諸家失之羊腸詰曲作記時
適廬山瑤公鏡虛義山運公佛乘同社郝公琰吳季立
在座請各以詩詠爲標題傳布於娑婆世界余不得秘
賦軸而散之

天都峰絕頂記

潘之恆

天都峰絕頂圖經向來云不可登今癸丑夏聞采石耳

人言可登猶未信九月十四日普門師同上足恆心蓮
花洞姓僧賈勇直躋其巔近巔路塞峭石矗立如板屋
有罅縫若界道可側身入得凹穴穿穴下數武復緣壁
上如發天牖石纍纍四五絕或方或圓最高者圓石也
有小松爲遺火所焦踞之坐可容十餘人選隙地不滿
丈將建石室祠黃龍余以意測之軒轅乘龍上昇應稅
於此令小臣至今可以趾跬不必攀鳥號而墮矣

天都峯頂三奇記

潘之恆

丙辰七月八日澗庵上人同衣九衆登天都峯絕頂路

甚徑而無險有平石處廣可結茆三間其下一石支之
分二洞若於中雷而陟其巔潤庵從絕頂與九人者累
石成塔高不逾尋丈從慈光寺望之如人立空中而招
同游者更欲建一幡一燈成三奇以標之乃於八月一
日揭一竿以縣幡燈皆書勝峰山三字而石罅天成爲
之砥若受竿者越九月之望直指駱公太守劉公猷令
夏公咸登海子瞻禮焉從下望者石塔如人立幡如白
鶴翔風燈如神龍吐珠也故稱三奇云

蓮花峰記

潘之恆

黃山尊嚴無如天都峰而中天挺秀浣濯柯漢則蓮花
峰獨示變幻不可勝紀從湯口至祥符寺望之如西華
玉女洗頭盆如漢廷承露僊人掌挽目仰矚如簇青蓮
花房萬葉擁護爲人山第一觀矣由南徑慈光寺上摩
老人峰頂東進文殊院西面見蓮華最高處石瓣開敷
可承趺坐惟西北缺一二瓣不成圓體南下菡萏一峰
稱少華則玉葉可攀又下一峰爲桃花峰飛梁若連理
附於兩峰之間甲寅歲甫有路可登上陟者沮於龜石
遞其脊而得罅又沮於幽壑窈冥其洞如竹節攀而上

升數折可通天光沮於石梁不得飛度又見雲梯矗空
爲旋踵者數數然矣援二梯而上始履其的松鬣參參
如蓮鬚俯視諸瓣紛紛若脫危哉乎置其身於寥廓而
以一微塵點太空也余友方外佛乘心悟之而不能言
或言之而不能書惟雲間顧山子悉其曲折以通於菴
蒙之間余因之作蓮花峯記

蓮花庵代繪記

潘之恆

余於蓮花庵凡五游游必信宿如對鏡見影離卽彷彿
雖善畫者不能還鏡觀甲寅孟冬之杪子弟佻之讀書

其中雷榻共臥朝起主僧長筆請作短記以詔繪工乃
向天都作繪天想於時霞暎朝日霜薄露滋山若盥沐
而出天都西向儼軒皇影纓而垂冕旒青鸞僅見華鬘
侍帝之左上安鉢爲盂而朱砂紫石承之若張翼而焚
其尾右次日老人當南極政不必以僊人易之凹處卽
文殊院所隱瞳瞳瑞光騰霄漢者非耶蓮華峰右翊額
出若茵茵之未華桃花雙葉外護之其爲郭則師子僊
橋在指顧滅沒間而盡於湯嶺此涵鏡中者也而庵若
朝妝麗人見鏡中影自媚爾水簾洞久塵野夫非菱花

之萎耶雲門創立於左峽起爲雲濤議初小刹而未成
今所亟者在觀音大士閣拓其基矣從雲濤一泉如縷
而下爲洗藥溪漩洞而爲藥銚又滙桃花澗水注於白
龍潭則山中靈淵之都也里人鄭無著開運從湯院左
石隙宛委而陟得衍處曰桃源擬結天都社於此同价
之方獻叔履石而觀靈淵足沁心滌魄矣其底三石則
莫測其深而羅漢級一道鑿石齒齒如金繩界之則慈
光之菩提場也無著能開徑而圖若有靳然若輞川詩
中有畫則此記爲之素矣

勝蓮峰文殊院記

潘之恆

天都蓮花兩峰間其壁聳立者曰勝蓮峰中闢一道場
曰文殊院普門大師從代州夢境得之乙未秋中歷攀
陟而履其地爲夢像臺上有跏趺坐跡與夢境證左則
天都排列危峰芳幢如建牙衛右蓮萼開敷一齒香綴
之下纍纍者爲桃花峰內掖若巨鰲飛翔於左而獅子
昂首奮迅於右後簇奇峰爲展而奠居之徘徊四顧不
得逕下綃實穿石再出其底又不得逕左縫右坎刺縫
爲石障植表於坎如垂雷仍攀松而梁之始還焉皆束

峽上班侍者日芻林再折得怪松三株二畔立若童子負劍於長者一臥而隱凡若自在觀音作思憶相俯仰依附根皆糾纏如纒吾見連枝者矣未見璠其抵者且踰峽以構若牝牡之合衷擘峽以行前憩蒲岡石望寶幢建空中儼吳道子所畫觀音立像手執楊枝其右彌勒獅子跼肖而列峙之稍緣仄石面陡削名服栗坡經漏光峽者二皆磬折而踞其奇惟觀音幼尤勝左馳踰平岡趨蓮花洞右眎飛磴爲陟蓮花峰此其分運也然所稱老人峯諸石總總特起不可名狀忽折而南得一

方障可十丈許普門云吾所取道爲此石也而文殊院之勝從此岐矣望雲梯而上可瞻觀三院題曰觀嶺從此翔下磴石上松枝如鬣而常磳影出爲鵲吻如殿角參差雲中從墜虛而憩者凡五石皆嘉木蔭之而一壁可盤繞鑿級尙未竣行者貪奇而忘險倚爲化城峽中兩壁皆拔大劈斧良工所不能施巧卽朱砂老人壁也惟小竇幢在老人峯脊余向從法藏上人登而倚之勢若浮動其形銳若峯矣水流四道匯於慈光山門溯源而上名曰星海直分鼎湖之溢雙注於湯谿復合爲澄

淵以無盤旋曲澗惜少停滴耳時甲寅孟冬晦日從普
門師口授紀於華嚴堂

蓮花峰頂不立名字廣記

朱 鷺

黃山峰數第九曰蓮華峰頂石巒起若蓮瓣簇故名又
是峰中處羣峰遙邇相嚮成一大蓮華故其高九百仞
陡上鮮有陟者又况建豎行師普門搜冥凌絕經累月
相之躬爲扶其實塞通其雷鱗高高下下宛轉上尋得
殊勝致稍挾濟勝之具便可邇而升也方拮据數椽欲
廣其上予適來山中師一日子卽契遠拉同登曰是第

一來試陡者先引至新鑿池厥泉滿冽爲題勝水池三字稱師旨師言蓮非水不生經有勝蓮華之稱云广基當頂石下縱橫可二十笏佐之定方向得寅申局朱砂當膺光明負背天都腋左大悲頂之兩金剛腋右見大奇特予問广成當何名師曰正不欲安名字予瞬師師亦瞬予相視而笑少憩縱步頂旁下臂二銳石離立各虛一仞許濶高可三十仞絕似華辦欲出迢峭可人顧無緣接莫能度予奮躍度其一師曰居士乃能去耶予咎我不來也師笑曰好好只怕恁要來予不應又睥睨

第二銳師曰更能去不予曰只去一不去二師肯首既下觀匠作斲柱卜詰朝立柱也爲萬曆甲寅夏四月之三日子探囊得賣墨竹貲修字號者勞匠師同游方若淵若繩私問予不立名字意予直應曰此表法也大清淨心蓮華爲喻是相卽幻是名卽假是峰居衆峰之巔是广居衆广之上向上一着言思不載名字安着師婆心熱切便欲借此接上根提下根矣二方莫逆舉以似同人潘景升張季黃程申之孫石鄰張韋玉皆莫逆遂書爲紀致普門師師曰又多乎哉是第一來試陡者

禮蓮花峰三禪院記

葛寅亮

由湯寺上朱砂庵少憩踰老人峰仰視蓮花頂鬼然迺
出分左右藥各起層巒俱名蓮花峰其右藥頂爲文殊
院過老人峰折而東上名觀音幻者卽文殊洞口菩提
路也其洞石崖欹仄若無徑者緣此而入夾路懸崖百
仞中僅一罅如巨靈擘者罅中行數百武稍折兩崖中
斷下臨不測跨棧而度復入罅中行百餘武徑塞仰見
一竇梯而出再折百餘武行巨石上古松綠之徑約二
里許每過一折令人驚絕自此抵院院倚危壁左右降

而稍起翼之前一石峰中微突似鱗左右突而崔起似
瓶正當其案若可撫也案外羣山蹲伏雲天一碧披襟
快然予入禮乃九月十一日時值頌梁亦一緣也因爲
題其院額循故道返下觀音坳西行登雲梯予方扶筇
以移其踵遙見一衲蒙茸跣而昂然直上者與人謂普
門師至矣予迎呼師來攜我師曰須你自走相視而笑
師乃引予過雲梯望蓮花頂而躡焉徑口雙石削立似
石門以魚貫入過此爲西方路皆從危巖空石中取徑
忽幽而入遂谷忽敞而躋懸崖每絕處得轉別是一天

自石門至此凡九折各各呈奇不可思議視菩提路峭拔稍遜而屈曲過之亦二里許其上編茅作室視文殊院又在肘腋間矣背負巨石高十餘仞普門師先登以繩引予而上至巔則一平石徑丈許可坐四顧曠然無際前後諸峰簇簇如金吾衛士擁盾執戟而繞於楯陞之下蓋黃山三十六峰惟蓮花爲中支再行爲天都差足相峙餘皆環護於蓮花者故非居蓮花頂無由登峰造極而窺黃海之大觀也旣下出石門越天梯徑乃稍夷他山皆骨而此雜有膚翳然菁棘亦自映人有巨石

如半月圓淨秀異一茅庵臨之普門師指衍地最鍊丹
峰半是將作普賢院者其山自蓮花峰右藥折而西此
居腹焉其面卽鍊丹臺如乘六牙象又進而趨光明頂
是稱山心萬峰拱之將奉今東宮所頒大悲觀音像爲
大悲院普門師云中觀音以悲左文殊以智右普賢以
行缺一不可所爲作三禪院而鼎立於黃山之巔者也
觀音普賢二院仍舊勝而標之煥然易觀惟文殊院靈
秘向非人跡可到普師從定中得境闢之予謂宜表其
從入之路普門師曰吾正不欲名予曰西方持念亦以

名號顯大悲乃極樂之導師蓮花又淨土之勝報卽以
西方路名之以文殊院路名菩提焉予復從普師下普
賢院出天門登光明頂而別從光明頂俯視石筍竝飛
來峰各擅雲石之奇皆得於遙睇未若西天菩提二路
之納身巖石中倏塞倏開離奇天矯以取勝爾諸探海
者能侈言他境多奇獨此徑初闢怪幻若出世外予特
著之俾負奇士情溪泉石不可導而西耶

師子林記

潘之恆

別松谷北上海子卽面石筍峰峰苔秀而穎餓分片石

若霞冠道人候化爲三台直逼象緯其穎益莊嚴凝重
令人望之肅然披石林上凌谷口一柱當之折而南忽
得石筍矗諸峰森布而中峙者卽從松谷道所望穎也
相依三十里遂傾蓋如故人先是有五臺僧一乘別余
入山將建淨室於後海首創谷中以招好奇士余登砭
而呼一乘則方負土拓基與衆同力卜壬子年三月甲
辰十八日壬子甲辰時爲三德聚期頌梁於茲辰以墊
蓮座前對一峰列如石屏爲師子狀或蹲踞或昂顧其
狀不一二月中飛光岫見攝身光一乘與匠作咸見願

畢施力實未募一錢視寓安一鉢尤難以無所馮依故
月之幾望湯太史來期海會一乘喜曰貧道天啓其迷
從五臺結侶於茲願效精衛所銜謀枝樹之計得地石
林谷中其土五色幸可建刹又遇宰官偕居士同日臨
之所稱三德已驗不知何以名茲庵余曰師發願自五
臺佛爲見瑞光於海印繼師子窩而興起宜以師子林
表之若湯太史則文殊化身也直以一莖竟之何難夜
伏草榻書此記旦日以呈同游諸君子

猗中記

汪道昆

黃山苞巖谷以百數其隕區則祺中云豐樂水出雲門
五十里而遙經七百里入於海祺中山四合東西不見
水端其山南北相距百步有奇東西凡五百步東最高
者曰羅條逶迤稍北據上流曰牛鼻西最高者曰樓臺
逶迤稍南當下流曰乾谿乾谿視牛鼻齊其下爲石礎
嶺石礎東折曰壺嶺又東曰壺山山多土可封形家卜
兆者二依山闢土深五丈修什之累石爲阬高二尋修
廣參之一阬外爲田十五畝田外爲蹊曰飯牛蹊蹊外
爲谿卽豐樂水也谿以南皆石山沿流若步障草木皆

齊其西浸殺而卑若鳥翼張水上谿薄山而稍稟蹊臨
溪而稍弦田與蹊齊蹊出則出蹊窮則窮剡兩端若張
弓因地勢也蹊窮汴流而上石磴出灌木陰谿石如龍
門水湍急褰衣可涉既濟乃得汴洲上流出黃竹潭抵
洲分而爲二左循山右循磴洲窮復合石梁當之亦一
藪也西薄石磴而南折爲桂竹灣其下爲桂竹潭潭上
石磴達谷口脩與飯牛等廣半之石互出如犬牙狹者
曾不受足林端出石溜纍纍如貫珠水流石上如建瓴
多水草其南巨石當路出水上高可蔽牛又南則谷口

矣昔在嘉靖主人始有猷中歲用其廩有事建置避石
磯東入谷爲石門入門就巨石爲釣磯拾級而上坐釣
者其東石趾可容席列石基置木濱釣磯以東步蹠踣
爲棧道又東則裂石如環堵今屋之巖棲川遊此其一
息也進次石溜屬浮丘爲銘進次石林延十五步如閣
道俯臨石磴爲欄楯遊者相與班荆可再息矣依壺山
爲華陽館傳經者居焉堂曰章堂則易教也牆東爲圃
築東北隅爲樛木亭亭中視南北山羣木千青雲蔽百
畝編竹爲籬衆芳在焉華陽西爲野人居又西爲冷風

閣衡五達閣居南端三面皆綺疏天風四至翩翩千仞之上矣牛鼻乾谿當左右牖若出蟻肩行人杖屨度石礎出沒木末若圖畫其南墩草鹿下飲不避居人僧祖胃署曰鹿谿鶴鹿園也有石虛中如欹器正立中流浴者亟就之署曰天漏中洲列石雜坐覆白茅爲宛在亭竹簾及肩人跡罕至冷風西下築石爲象隄隄橫出截谿流高視石阻隄上爲西枝室奉瞿曇隄下乘橋而南水涓涓出石罅當暑不絕僧呼阿耨水飯僧者汲之橋下置屋懸巖中爲方舟拊其廣五几淩不及一筵形

如樓船居者若舟遊耳居五載主人以次告成余客饌中則相與程土物議方向余謂考祭畏壘至今誦說不衰則其人以也後之顯者竊土木而文繡之不旋踵而名不傳其人非矣主人務折節爲儉顧獨亟從事饌中要以人不勝天文不減質且其人長者蓋庶幾有聞焉主人謂余鑒有九子無能訓之以儉德顧獨作無益備遊觀雖鑒亦自知其無良願客志之以章吾過嗟乎鄧侯以壯麗謀國而以儉師子孫卒之漢享有道之長何論蕭氏藉令諸子不改其舊爲守成爲兢兢卽世世可

知已不則天地一籛廬也謂作者何主人爲余肺腑親
姓蔣氏居豐樂里

松谷草堂記

陳日浴

黃山有南北二道南走歙北界太平由北道踰芙蓉嶺
折而入溪壑縈帶勢轉豁達度橋行里許幽石基布緣
隙轉平砥可坐飛泉懸瀉清響激越不息渟滌爲潭色
淡碧層累若綴焉上則竹木宗生雲日蔽虧有寺爲松
谷由寺前度溪復上巖石非一狀爭氣負奇則有如人
冠纓拱立者如僧定而坐者面壁者如碑絲字而峙者

如屋榮軒而啓者闔者如馬騎而欲馳者如鷹振翅而欲擊者如橋懸者其餘倚伏欹側崩奔皆若刻削然類有意者所設施登其巔則峻嶺萬仞爲石筍矗可通南道以窮三十六峰之勝焉余友人曾子大還始遊而樂之欲投老其中家太平令聖璽君聞之則爲量材伐石平畚築命胥巡功閼二旬草堂成名曰松谷草堂記地也其堂四楹廣長各三十步四面皆窓令可眺遠迴廊可待行藥丁未春余重過太平訪大還山中因屬余記之余惟古之君子牧於其土類樂得有賢士至必設禮

延請時以問政論道詠歌唱酬昔裴冕爲杜甫築浣花
草堂呂公著爲司馬光范鎮築得賢堂馬止卿爲蘇軾
築雪堂錢公輔爲查道築清容堂皆載在郡乘傳爲盛
事自宋迄今五百餘年矣寥寥不可再見而余家大令
獨能繼續其風流於已墜不亦賢哉且主賓行誼相得
於古人又何讓焉於是遂書俾勒於石今後之來遊者
得觀覽焉

竹林庵記

陳輔性

下湯嶺十餘里蓋有竹林庵云庵當黃山之麓雖無削

望曉殿虬松怪石足人覽眺然自峯頭至此覺川原夷
曠畝畝相望羣峯遠映萬竹交森雞犬鳴吠於兩林樵
牧歌唱於前路其視山中又別一境界猶之擊舟三峽
亂石翻空驚濤拍岸駭目眩魄之餘繼出大江浪息風
平游泳自得殊亦快意又其途爲宣池交荷遊人衲子
所必藉其憩息者則此庵乃黃山之小歇脚地而結構
尤不容緩者曩年曾建有數椽地方就以祈雨然屢興
屢廢今榛蕪數年矣行僧無凡體貌樸樸願力堅貞舊
嘗住其師心空修復翠微寺今見古蹟之久湮獨遊衲

黃山志卷三
之無托矢心重建檀那亦信其樸誠可任競助成之梵
宇聿新佛力弘護不惟往來遊人賴以免其渴饑而雨
風及時年穀順成其有造於地方也亦非淺鮮矣庵舊
名偃壇宮竹林其今易名云

翠微寺記

駱駢曾

黃山遊屐波及翠微翠微者黃山之餘也天都蓮花諸
峰昨嶠雲表令人驚喘不敢迫視徐行翠微道中山川
逶迤隴陌相接悠然有山陰道上之致故不減黃山遊
也獨怪麻衣道人脩然雲水不罣一絲何事嬰情去留

乃有四海無家之句如余乞歸數四正以無家可歸第
令無家蓬瀛萬里如意所適豈若麻衣老人棲棲翠微
峰下以半偈乞靈禁中哉

天都社記

潘之恆

古之禪人與詩人相結社者自支許而下大暢玄風迨
慧遠旅棲匡廬應夢闢教大眾響答雲從於是以伽陀
至者三千餘人真信之士百二十有三稱高賢者十八
而淵明康樂交往雖密名不與焉豈詞壇宦跡與禪關
不相流通抑二人者不抗不隨爲護法爲忘形交也耶

此絳華藏未轉普門未闢而圓融之化未孚千載之後
乃復見天都社爾天都爲黃山第一峯饗黃帝於丹臺
翔招提於法海凡皈依者必望而宗之在昔嘉靖壬寅
王山人仲房主盟而陳鄭程汪江方諸賢踵至稱一時
盛事其篇什具在余爲梓傳之越六十九年而復修盟
日皆重九固非偶然者先是普門禪師自五臺來一見
黃山而不忍去將以是爲菩提場而鮑儀部山甫于此
部中甫實倡之其明年同志二三友人鮑元則鄭無著
丁自宣虞采兄弟過余有芭堂邁定此社大都謂禪修

者浮漚其所寄而詞章士或幻境其所遊則託於一
去之倉卒一臨莫適爲主宜乎說者因案而索其
新染指社之不立同流其奚歸於是卜地選場得於蓮
花庵之右布席梅鴈間仰天都凌法海瀑水雙挂紫石
際空堪以與主奉之夫非吾黨之東林而普門之鹿苑
乎哉客有卽次而僧無因循華嚴大放光明在此舉矣
爰開士法藏每欲建普門例建兩室於新刹之旁余做
無門洞緣則漚五流而居之自此社定法藏可弛其一
肩如將廣容聽法修行之徒微普門法力不易竟此其

以是社爲之招

潘之恆曰詩與禪之不能合也禪不必通詩詩不必悟
禪兩者皆障夫佛假偈頌申言詩空色相而後可超乘
也惠休寒山詞林所宗長慶禪喜桑門互證今之入社
者黃儀部貞父洪奉常平叔吳學憲無奇與鮑子兩公
皆慧業文人潛心止觀禁酒無攢眉而揮塵多逸韻同
教方興光明彌布斯社也雖終古勿替可也萬曆庚戌
九月

同社規則列左

一是社以禪誦念佛稱淨業爲常規以詩畫作文科
慧業爲游息非是二者不敢延入

一主會各出銀二十兩入社建屋買田每年推一人
在社遷主其事請代乃得出山

一與會僧俗各出銀伍兩至拾兩止至社如歸卽久
住不費資糧社外事不得與聞支銷

一遊僧遊客如上二流者至則受供

一入社須主者會衆延請擇其賢否然後書名毋得
濫及

一老僧病僧老病居士無依者俱送普門院二堂收養此社不侵其事令遵普門例行

一結社原爲靜修若會中子弟講業延師似宜別選勝地不得假此爲館其端一開久則社廢豫戒之一蓮花庵地鮑元則買建西連雲濤庵東至祥符寺界并雲濤庵地南至雲門峯腳丁自宜買建俱入法海禪院爲下庵其地鮑丁二家喜施永遠皈法海道場不許居停自私妄生分別如僧俗人利己背公者共擯之

曹溪記

潘之恆

曹溪黃山之東掖左阜茨嶺右雙嶺翊之良風阮阮其
北一名胡八脈自車盤嶺來良源西注潘源東流匯於
曹公溪下曹公先世得道之士白晝拔宅升霄不知其
名遺跡在銀杏根之陽黃山諸謝鼻祖之墓在焉圖經
稱浮丘溪阮公溪以曹公溪附皆得僊者阮溪近黔縣
界二十里而合浮溪在雲門峯前又三十里與曹溪合
於石壁衍爲長潭稱三溪也繇芳村出五里至丫口勿
揭沿小徑東北入山坳步漸高可數百仞左顧見雲門

峰再上見蓮花峰而天都最逼不覩全體然皆肩齊無
聳拔者是名雙嶺以重山名之踰脊下益陡山半得石
澗青石齒齒流激而清想漲時定飛濤振響也得憩亭
益幽邃谷口哀斜知有佳境則人烟朗朗百間大有曠
致東折會碣石溪流始廣而故友方子中之別業所依
見于洎明假修其間衡門泌水可以樂饒而沼涸無魚
輸濠上一籌矣同里曹季野與山中人謝伯謙聞梵音
而喜招與同飲余亟訪立禪僧僧居東阜禁足小庵門
對高峰削平而脊若雙峙余以鏡臺名其庵是夕宿別

業之樓明發別曹公溪屬季野以一單祀曹公毋忘僊
裔季野云君亦勿忘潘源潘源卽青石澗豈先世亦有
學僊者居之行入五里曰碣石石龍從出澗底大於華
轂所知謝季玉家於斯梁新成跨良源之口余題曰羣
玉橋從此入溪谷有亭始舍輿蹣跚而上可數百仞與
雲門齊而肩摩蓮花天都直窺後海僊都之嶂見光明
頂之月塔與翠微之僊橋雲中之布水若作繪圖則英
嶺爲大觀矣大約總黃山而論天都蓮花兩柱爲之樞
僊都東北一鄣而恣展其勢以展兩柱非英嶺孰舉其

全哉踰脊東下幽邃倍於雙嶺東峽深淵恍如蜀道中行最奇者官田之峽有石井其澄靚百丈直通於滄溟浮槎汨沒莫能挽之出故非爲欄無敢縱目遊者問一粒庵不得徑或指墅村後可躋迫日晡亟行原田歷歷爲開黃里烟落矣訪兩謝不遇飲謝起吾宅巖山弁其後遙睇文筆玉屏尙餘秀色與和民訪壺山庵主空如杳然道故夜分而寢余紀黃海斷自壺山爲東道首其東南首容成臺東北首消搖溪北首松谷西首麻衣道塲而曹溪爲之冠蓋表僊蹟也

三海門記

潘之恆

世稱海上三神山豈非可望而不可卽爲秦漢之君所
難褰裳濡足者耶然古之詰人咸寄遐慕逝將浮之蹈
之此豈託之空言也者若黃山之有海子蓋神僊遊蹟
汨沒其間樵雲攬芝之士能名之而無所據能見之不
以爲真也好奇者務鑿空冥搜求鼎湖溫觴以當崑崙
星宿海終莫可疑間登鍊丹臺望洋意滿以雲濤虛無
足闡華藏觀止於石筍竟未尋所謂三海門者一跂足
望之何以誇大秦漢之君笑僊才之不足也乙巳夏從

馮司成公登絕頂今年與黃儀部公相先後惟恐一失
海門而竟成獨往客徵海門狀則告之曰海門者由平
天砥循鍊丹峰後步龍脊里許往往爲怪松枳道下脊
不數十武劃然壁裂數丈洞窺天光若乘漭沆未之奇
也旋踵得右壁裂益巨石益雄登頂據危而顚臨大壑
已懸身千仞之顛下視如墜空不知有底俯睨丹臺直
培塿之徘徊崖溪間削玉攢翠起伏萬狀無風而振不
樹而濤不蜃而虛不犀而駭畫壁稜稜閭闔觀飛龍黃道
而鳥獸無可馮陵之跡草木鬱鬱葱葱其中靈怪殆不

可謂惟翠微峯倚天一碧而傲余以孤秀者下此稍遠
百武復闢一門雖跌宕過之意無踰向觀遂自禁目猶
攝衣陟飛雲石右遠三匝而下石如樓片雲而承之以
靈掌若縣空而腹剗其半愈覺危予蹻之若素履實因
登海門氣壯左右莫不辟易日景將仆追黃公於蓮花
洞莫及夜宿朱砂庵凌晨會於沈藥溪而語之勝貞父
曰子真以海觀海而海窮吾以非海觀海而海幻且吾
與子所涉無非海者如必廣陵濤起予睂睫孰挾三海
門而鄰之天外哉予愷然不知所謂遂筆之奚囊以歸

倦燈洞記

潘之恆

由丞相源左入二里許已眺東源不進右折而上甚崎
嶇足疲甚恃推挽之力沿仄徑西行從沙脊望龍樓峰
亦奇觀整躋數里途窮得澗白石如積雪水淙淙鳴賈
勇攀峻坂以登稍東而洞劃然如壁巨人踰高如偃蓋
窈窕處縣雷三僧架木以承泉若置盂而接雲巢棲焉
置板屋如閣道供佛甚虔翹首對青鸞峰若玉女端侍
而天都則帝座儼臨之高髮垂髻徐送嫵媚撩人眉睫
下顧千嶂葱蒨可憑巖石肖香鑪者當洞門兩傍花萼

爲翼昔人見僊燈焙微乍隱乍見不可爲常後有高逸
棲止故亦名僊人洞東出可通石笄砭真黃山幽勝處
也庚戌四月三日同釋寓安所親汪無畛用嘉宿洞中
日夕嵐光撲人青鸞冉冉可招而下余山棲三十六年
僅得此一日蓋亦奇也

諸龍潭記

朱苞

庚午十月天尺樓朱苞來遊黃山初以爲皆山也卽有
水亦以爲必山勝也更乃得水如諸龍潭焉從湯泉外
溯流而上則爲白龍潭從獅峰外注流下來入松谷庵

後所稱黑龍潭在耶其他青黃兩龍潭俱當松谷之外
壑松谷之上壑者則爲小白龍潭傳所載松谷四龍潭
是也然潭未必盡於此而以龍名者則盡乎此潭夫潭
以龍名者志異也而猶有別其名者謂異之不可一境
盡也或斜飛破窟以出其地異也或分瀉下於險其勢
異也或於微跌處忽宕勢復不同或兩岸削峭如屏或
夾澗居上流相摩或依巖若屋而淵渟若宮易地則皆
然也或抱石而匿其根或明澈如晶地同也淺淺又或
異也或脉連如串貫之珠其形像又異也至於漈漈湑

活澄碧如練皆色也泚泚歎噉如玉皆聲也春夏溢而
爲怒爲奔秋冬涸而爲凝爲靜皆性情也與夫朝日夕
月輝發如金沙布地者皆四時之氣也不可盡也予烏
能名夫茲水也惟有與山俱青與谷俱幽與草樹松檜
俱隱秀焉已矣予烏能名乎茲水也睠茲素懷浩漠明
清光抱耳目不知此地之古今

五龍潭後記

潘之恆

黃龍潭在青龍潭右高隔一澗中若尾閭旋下者數重
下益銳莫知其極波紋如緯日光盪之又一奇也谷雲

引躋一壁指爲源似鑿空矣湯太史名之珠淵且云非
象罔莫能得者青龍之下潭歆沫怒激尤爲奇絕而油
潭渥注所產固未易躋太史犯危至對之臨而無畏志
素怯而忽壯何也黑潭黯石蔭之色爲變卽濤滅亦佳
白龍之隱在路傍先爲一憩不及青潭之流沫長也谷
雲又言赤線潭在黑潭頂三十里計徑後海下當從師
子林探之卽谷雲未覩又謂油潭非五龍數宜以赤線
冠之傳言黃帝探赤水互珠其名可勿易爾

消搖谿記

潘之恆

消搖谿相傳有容成子釣石是名錦魚谿或云軒轅秦
龍所也是名清潭上爲清潭峯予夢寐四十年未得探
今從湯太史由禪院後踰二嶺得中源菴其舊趾屢生
峯旁立雙劍香鑪諸峯故勝僧涵虛汪氏子也近挂一
瓢面窮嶺覺陡絕無餘地顧獨身居空谷中可謂難矣
問寓安消搖谿路披榛莽行箐沒頂數尺約里許始得
澗怪石纍纍斷斷或立或臥或銳或禿或仄或陡行者
若跨若躍若緣若引若絙若絕與水石爭捷爭奇揚簾
鼓簫欲裂壁以進若觸不周蹠二華又若挾山超海驅

雷策電飄忽以度真擲命於九淵而不暇恤者乍舍澗而凌峭猿挂鳥飛所絕有朽木梁之余與導僧履而中折面皺爪脫捫壁作蝸延復振起踰蹕以免太史踵跡之去僅咫尺不爲卻而衆皆膽喪矣源水中出東西源夾之東力稍勁則合中西以敵激鬪於方石間題曰鬪玉天下之流委交觸自潑洛外渺聞故谿漲時亦以并三源而益巨東隄有潭如夾鏡當崖削而助其豪太史謂勝開先玉峽下此爲潭者四五色皆縹碧落瀑各異態怒石亦殊觀或一束綫或散萬珎或積羣玉或折鄰虛

窺其底若神物居之莫測其際選坐谿濬觀雲中數壁
飛躡數百武始穿峽以升釣石雲壁益獻奇太史曰可
以消搖矣舊崖孤立下涵清泠曰青潭坪曩游者自此
返玉涵金樞封之崖半兩峰若肩太史及方生汝實猶
臨水裔下見一泓方臺矗焉有二龍子泳於波太史曰
止止毋侵龍宮而驚其族超澗石十里少憩中源猶觀
僊燈洞而後返於榔鉢院宿焉

月塔記

潘之恆

僊橋近已可遊定有尋雲霞間之秘蹟者獨月塔則茫

無可據圖經載僊石塔之目而無題詠余乃以意測之
是月塔也非從月來非從空得又非地涌因人所指故
有斯名吾操斯名遇與景合者卽以被之其誰見讓而
不應也與黃貞父登海子雨中過鍊丹臺宿一小庵三
昔不得去忽夕霽月出信步左阜不百武布地有仄景
月爲之蔽豈其古塔示蹟耶抑幻者耶就之則巍然方
石也高可二丈方廣四面各七尺梯而陟其顛平如掌
可跌坐五六人倒景跨壑舒百千丈如騫翥矣余大鼓
掌曰是爲月塔無疑因龕中僧號一指遂以指月名其

庵又逾歲爲壬子過智空師光明頂理前語如指月說
智空曰名則佳矣以稱月塔則誤余難之曰師豈得其
真耶而曰然出其庵背躋石岡數十仞則圍石刺天起
木銳如錐又進而見便腹若縣鼓者下有方趾支之實
三成以象西方浮屠日月出其底騰光萬道景射河漢
而白毫照映幻相百千塔而未止時罡風拔地氣不得
吐步不得畱若將徙塔去有鶴羣飛盤旋其頂而不肯
下余顧同遊者曰嘻是真不負月塔之稱吾其從化人
游者乎向者晦而今也望向者頑而今也幻向之見者

塊然而今之觀也壯智空發我覆矣雖然月不兩輪亦不孤陞彼臺而此塔也又誰曰不宜越三年爲乙卯僧海運過而題詩月塔之名始顯而山史追爲之記

湯泉記

潘旦

黃山名泉七十二而湯池爲最寺近池人以湯名之不知爲祥符也池有二上池廣六尺許濺三之一泉湧如沸湯大石覆其上如洞浮漚滾滾吐白沙中流入冷泉如貫珠然上懸崖千尺鐫元鄭師山諸詩文磨滅不可讀溪流數十步爲下池又分爲二小者稍隘里人呼爲

女池大者廣倍之而無覆石沙漲水淺小石齒齒如櫛
子狀絕壁篆湯泉二字或云僧汲以釀酒香味自別飲
之可以延年病瘡者浴之輒瘥真異泉也予里亦有石
泉源源清流寒砭肌骨雖酷暑人不敢浴予甚奇之今
復得遊斯泉方嚴冬溪山積雪萬象閉藏而此泉固溫
然可浴殆天地陽和之氣偶泄於此不尤奇哉予於是
始悟陰陽造化之無盡藏也喜而記之

湯泉靈驗記

汪師孟

元符三年正月二十三日休寧民金居德與太平民牛

振兄弟來浴湯池以晚不克明日迎曉而往則見數池
盡變赤色洋洋若流血咸驚視須臾地勢傾動池波沸
涌洶洶之聲如雷屋舍皆震三人馳報寺中寺衆曰此
必朱砂見也乃相率往觀有客僧惟諒觀其有利於已
裸身入浴衆止之不可於是行者邵道明急以新舊瓶
二十四貯而藏之山下之人聞而至者紛紛或汲或飲
莫知其數至二月二十四日其異又作但小差於前再
驗數月啓視藏水新瓶香甘舊瓶臭穢不可近矣好事
者往往澄其砂以爲藥焉是秋倉憲耿公按部至山主

太上人以一瓶獻公嗟味久之而歎薄徐君元龜適
迂公在彼亦攜一瓶以歸曰吾有老親願以遺焉自是
求者日至不足給矣三年予與二三友人游山因以其
事審之於太太爲予言之甚詳且曰見者非一人吾言
豈敢妄邪蓋予之中表有親見之者與大之言不殊茲
其所可信也已然或者以爲既是靈藥何不濟人必妄
傳也而執者又怨惟諒以身觸之遂致無驗是皆不然
此山川之靈時自變化爾奚預於濟人哉且曰自古至
今浴者蟻若然豈惟諒獨能觸之乎但人自有遇不遇

者耳明年太將鏤圖經及古今詩行於世子適往見之
太謂予曰湯池之靈君知審矣能爲記以信於後乎予
諾之而未暇也既歸乃書以遺之附諸鏤板之末昔建

中靖國元年五月九日

鄭玉黃山湯池題名小記附 邑人鄭玉于美舊嘗
讀書山下寺中後遷紫陽南阜遂耕師山之陽釣於
翠山之陰久而天子知名出內府召爲道使者以南
招玉爲翰林待制玉以涼德辭不獲乃從使者至
海上以疾而返復遊山中訪尋舊蹟時喪亂之餘半
已湮滅獨川流山峙不改依舊乃於湯泉題名石上
而去時侍行者吳詵胡炎鮑應謝真保吳陽鮑觀復
有元至正十七年春二月辛亥未刻三遷
汪泉志已錄卷一此三則附於格物匪徒以推
博雅也因補錄以備參考

方以智云山海經道州有美谷江浦志秦少游少
下溫泉十三處陸友仁言匡廬汝水尉氏發谷豐
和州之惠濟新州之陳氏山居爲最遠征記曰東萊
郡出溫泉恆清鳥雀羣翔安成紀云宜陽郡出溫泉
未陽縣出溫泉博物志云不同雲水之水溫如湯梁
州記云漢水南有溫泉周國數千步冬夏常沸可熟
雞子未至二十里便望見白氣衝天袁山松宜都山
川記曰銀山縣溫泉夏竭冬流上言言得氣浴
衆卽愈零陵縣記云溫泉中有石穴分道其陰寒其
陽沸劉義慶幽明錄曰艾縣縣山有溫泉二泉熱者
雞卵冷若水雪流數丈而合又肥水北合婁山鄒水
之溫泉至冬則援護木合雲水處有溫泉投置卽熱
有細赤魚游之卽始興記之溫泉赤魚也沮陽武大
鄧小鄧山有溫泉下足便潤不得言言則愈熱而陽
宛縣有紫山湯谷魯陽縣大和川云溫泉水湯側有
石銘曰皇女湯武周縣有黃水合火山水有大井火
鼠火井之旁有溫井魏土記曰代縣乾城水北有
溫泉療疾下洛城橋山下有溫泉漢水還新誠會溫

水熱可燐雞魚腹之鹽水與溫泉對注汝寧商山有
溫泉南康郡志遠公朱砂泉詩曰一擎高拂白雲邊
下有朱砂如火然已是氣蒸千里煖如何潤石漚溫
泉卽周景式所云主簿山之溫也東黃龍山北麓有
二池張勃吳錄曰丹陽江乘縣湯泉六處禽魚立爛
而煮豆穀終日不熟華乘亦載之升庵言雲南溫泉
甚多而安寧無從確氣後周王有銘曰白雲上徹丹
砂下沈可知溫泉以丹砂爲上胡仲玉語錄云取黃
山朱砂泉春微紅可茗鑿山是茗泉郭清源孫章詩
話言福州之溫泉以溫國膏和鹽浸去與茶田二溫
泉分寧最熱毛竹山泉則溫溫川湯山二泉一沸一
寒五擎山下者能潤人類今北京西山雲蓋溫泉大
小湯凡三而遵化縣北之溫卽古稱徐無城東之溫
城嶺光麓之刺馬關等溫泉最甘馨天寧州溫此其
一耳和州二溫一無硫氣智拔卽陸文仁所云惠濟
泉也故鄉溫泉出於石穴天下處處有之不能悉記
先儒曰地中陽氣遇濕而結爲硫雷火亦有硫氣陽
氣也唐于西取硫置水水不溫以此數之然三拔謂

別無朱砂暴暴之別故知然不溫泉地中陽氣所結
分砂疏暑暑不確也

器植云溫泉療冷與疏同治其不作疏氣者有所隔
別如重湯煮物也然湯遇水而死為疏木遇陽而死
為蒸木火相切互有所變故蒸可收疏毒

方中通云陽氣聚而過或出溫泉或結疏或為火井
非疏來溫泉也凡疏客隱皆陽氣為深淵于土者
疏與銅卵相因則其烈矣疏乃惟疏專顯其熱耳
朱砂與溫泉無異

佛過記

米萬遠

壬子八月普門安上人航大佛過河西間時予以開門
之得諸贈御先是上人以開山乞名入都于雅園行僧
名嘗居之燕邸時絕無迎像念乃其欲造十方佛則最

初願也不意絕以無念得此適符初願蓋佛固四面七
層且蓮葉皆像參錯週轉不啻千萬方矣固宇內諸招
提所未有者奇瞻哉予每爲關吏苦以關吏得此瞻仰
何幸也普門譚兩日夜使人塵根如洗落花若脫抑又
何幸耶漫走筆識之